

Bandongosolo Ya Gabriel Na Daniel



Mfumu kusakumuna nge, mpangi-bakala. Mbote, bankundi ya munu. Mwini ke ngolo mingi, samu na kuvwanda na tabernacle na suka yayi, kasi ya ke nkembo mingi na kuvwanda awa. Mu ke na kiese mingi ti beto lenda—lenda kwisa bubu yayi na lukutakanu yayi. Mpe mu zabisaka ti mu ke longuka ntangu yayi *Basabala Makumi Sambwadi Ya Daniel*. Ya ke samu na kusala ngwisani na Nsangu yina yankaka na ntwala mu baka Bidimbu Sambwadi. Ya ke na, Bidimbu Sambwadi; Bampasi Sambwadi; Bampungu Sambwadi; Bakiadi Tatu; kento mosi na kati ya ntangu; diabulu ya mbwaki yina ba me losa; nkama na makumi yiya na yiya ya mafunda yina ba tulaka kidimbu; nionso yina ke salama na ntangu yayi. Mpe mu banzaka ti mu fwana baka yayi ntete.

² Ntangu yayi, mwini kele ngolo. Beto zola vwanda ntangu ya yinda mingi ve, beto ke sala yina beto lenda sala. Mpe na nsungi yayi, na mumesanu, ya ke nsungi wapi kisalulu ke fioti, ya ke na balukutakanu mingi ve na mabuundu. Mpe, mingi-mingi, mpe bawu nionso ke na bivinga na mupepe ya mbote, mpe nionso yina, wapi sika ya ke kitoko. Beto ke zola kuvwanda na yawu, kasi na ntangu yayi beto ke na yawu ve.

³ Mingi ya batata ya beto ya ntete kuvwandaka na nganda na nsi ya mwini ya ngolo. Ntangu mu ke banza na ntangu mu ke lombaka pardo na bantu samu beto ke na kivinga na mupepe ya mbote ve, mabanza ya munu ke kwendaka ntangu nionso na Afrique wapi sika ba vwandaka kuna na nsi ya kitembo, mpe bakento ya bawu na bansuki ke diembela na kizizi ya bawu, ba vwandaka kuna na mwini mpe na mpimpa, ba ke katuka ve kisika yina ba vwandaka; ba vwandaka kudia ve, kunwa ve, to kima mosi ve, ba vwandaka kaka kuna samu na kusimba Ndinga mosi, to zole, ya Mfumu, ntangu nionso.

⁴ Mu lenda banza na Mexico ntangu mwini vwandaka ngolo ti, kukondwa kuyika, mu vwandaka na kivinga mosi ya mupepe ya mbote mpe mu vwandaka meka na kufula munu mosi, mwini vwandaka ngolo mingi. Mpe kumona bantu ke kwisa na ngunga ya yivwa na suka, na stade yina ya nene, mpe kukondwa bisika, ya kuvwanda. Bambevo, ya kubela mingi, bantu yina zola kufwa, bambevo; cancer, tumeur; mpe bamama ya kubela, bana, ba-bébé yina ke na kufwa mpe bima nionso yina, ba vwandaka kuna na nsi ya mwini ya ngolo mingi, ata kivudi ve kisika mosi, mpe ba vwandaka yekama kaka mosi na yankaka kubanda ngunga

yivwa ya suka tii na ngunga ya yivwa na nkokila, samu na kuwa minuti makumi tatu ya malongi na nzila ya mutendudi mosi, mpe samu na kumona bisalu ya Mfumu. Ba vwandaka kuna mpe ke vingila, ba vwandaka me lwata bilele ya nene ya kilo, ba vwandaka lwata yawu na printemps mpe hiver. Yawu yina kaka ba vwandaka na yawu.

⁵ Na yina mu ke banza na bayina vwandaka na bamfinda yina kuna, mutindu ba vwandaka nata kuna bantu yina ya kubela, yina lendaka ata kuningana ve. Mpe na Inde, ntangu ba vwandaka vukisa bawu ya vwandaka na mosi, mpe mosi yankaka na zulu, mosi yankaka na zulu, mutindu yina, na lèpre mpe bimbevo; ba vwandaka kubenda bawu, na babala-bala, samu na kukwisa kutula bawu na mwini yina, ya ngolo, na bisika ya mwini ya ngolo mingi. Na bitembo, mpe bansemo ya banzasi, mpe mambu ya mutindu yina, ba vwandaka kuna na nsi ya mwini mpe kitembo, mpe nionso yina, mpe ata kuningana ve to kuniunguta, kaka . . . mpe samu na kusimba Ndinga ya Nzambi, ntangu nionso, kima mosi samu na moyo ya bawu. Na yina samu na yinki beto lendaka lomba pardo na suka yayi, na ntangu beto ke na muludi na zulu ya bayintu ya beto, ba-ventilateur ke na kusala? Beto lendaka vwanda na nsoni kana beto ke bokuta samu na yawu.

⁶ Na yawu mu ke bambuka moyo ntama mingi ve, na kisanga mosi, mosi ya bisanga yina kuna na Banzadi ya Sud, mu vwandaka na lukutakanu mosi na nkokila yina. Mpe, oh, kitombe mosi kwisaka. Oh, mu me monaka ata fioti ve kitembo ya mutindu yina, ya vwandaka nsemo mosi ya nzazi na manima yankaka, ya vwandaka semisa yinsi ya muvimba. Mpe mupepe vwandaka ngolo mingi na mutindu ti ya vwandaka bwisa bayinti na ntoto. Mu tubaka, “Mbote, ba ke . . . Mu lendaka katula kaka kazaka ya munu, samu ya ke vwanda na muntu mosi ve kuna.”

⁷ Na mwa ntangu fioti mwa tomabilu mosi vutukisaka kuna na kielo, mpe muntu mosi kukonkotaka na kielo, ya kukubama samu na kukwenda.

Mpe mu tubaka na mwana-bakala yango, yandi lendaka tuba Kingelesi, mu tubaka, “Ya ke na bantu kuna?”

Yandi tubaka, “Beno lenda ata kubaluka ve na balweka,” ya vwandaka na stade ya nene ya base-ball.

Mpe mu tubaka, “Nge zola tuba ti bantu kele—kele kuna mutindu yayi,” mu tubaka, “na kitembo yayi nionso?”

Bawu tubaka, “Bawu zola kuwa ti ba zonzila bawu samu na Nzambi.”

⁸ Mpe—mpe na yawu mu kwendaka kuna. Mpe ya vwandaka na bamama, bana-bakento ya bantwenia, batoko ya bakento, ba vwandaka sawula mpe kuseka ve, mpe kuvimbisa bajoka na yinwa, mpe kutuba na mwa bankundi ya bawu. Ndinga nionso, ba ke kangama na Yawu; mpe ba ke ningana ata fioti ve, ba

ke vwanda kaka samu na kuwa. Mu vwandaka sala lubokilu na autel, mu vwandaka sala kaka lubokilu na autel, mpe mafunda kutelamaka, na masa ya meso ya kufuluka na meso ya bawu mutindu yina, na maboko ya bawu na kutelemisa na Nzambi, ke lomba mawa samu na moyo ya bawu, bana-bakento na bana-babakala ya bantwenia, ya bamvula kumi na sambwadi, kumi na nana. Ntangu yayi ya ke kima mosi ya mpasi na kunata ata mpe bambuta na kuwa, beno me mona. Ya—ya ke talisa ti beto ke na kima ve ya kubokuta samu na yawu. Matondo na Nzambi! Yinga, tata.

⁹ Beto zolaka kuvwanda na mvwandulu ya mbote mutindu Amerique nionso, kasi beto ke na nionso yayi ve; na yawu beto ke sadila kaka yina beto ke na yawu.

¹⁰ Ntangu yayi, mu ke na mwa kima mosi yina mu ke zola kusala diaka na tabernacle. Bantu yikwa ke na ba-Biblia? Beno telemisa maboko ya beno. Mbote. Beto baka Psaume 99 na ntwala beto sambila. Beto vwandaka sala mutindu yayi, Mpangi Neville, bamvula me luta. Mu zaba ve kana. . . Beno me tanga ntete Psaume na suka yayi? [Mpangi Neville me tuba, “Ve.”—Mu.] Ve. Mu ke zola ti, dibuundu, kutanga fioti mwa Psaume yayi.

¹¹ Na suka yayi, ntangu mu vwandaka ya kuvwanda na bureau ya munu samu na kulonguka, kubanza Nsangu yayi mpe Ndinga, mu banzaka, “Beno zaba, ya ke vwanda mbote diaka na—na kutangisa bawu kintwadi Psaume mutindu na ntangu ya ntama. Mu ke zolaka yawu mingi.”

Kikuma mu me vwanda fioti na nsukinina, ba bokilaka munu ntama kuna na allo-allo, kuna na Cheyenne, yawu yina vwandaka kikuma.

¹² Mpe ntangu yayi, na ntangu beto ke baka Psaume, mu ke na mazabusu ya kusala, yina ba me pesa munu. Ya ke Psaume 99.

¹³ “Kubanda bubu yayi, mazabusu nionso me tadila balukutakanu awa na tabernacle, mpe na banzietolo, ya ke salama na bureau ya Jeffersonville. Konso muntu yina ke zola kuzaba yina me tala balukutakanu fwana sonikisa nkumbu ya yandi, to kupesa nkumbu ya yandi mpe kisika ya ke vwandaka, mpe kutulula yawu na zulu ya chaire na nsuka ya lukutakanu na nkokila yayi. Ba ke tinda beno luzabusu mosi na ntangu ya mbote samu na kukubama samu na kukwisa na balukutakanu.”

Ya zola tuba, kana muntu mosi na bilumbu ke kwisa zola zaba kisika beto ke vwanda na balukutakanu, beto ke systeme mosi, kuna na bureau ntangu yayi, ti beno lenda tula nkumbu ya beno awa mpe kisika beno ke vwandaka. Mpe beto ke tinda beno kalati mosi, na ntangu ya mbote, na mutindu ti beno ke zaba kisika balukutakanu ke vwanda, mpe mu banza malongi, mpe bansangu nionso ya mfunu, kana beno ke kwenda kuna. Beno me mona, kana beno ke na yinto ya kieleka ve, mosi ke tuba *yayi* mpe mosi ke tuba *yina*, beno—beno ke bakula kima mosi ve, beno

me mona. Na yawu beno. . . Beno sonika nkumbu ya beno mpe bisika beno ke vwandaka mpe beno tula yawu awa, mpe Billy Paul ke lokuta yawu mpe ke tinda yawu.

¹⁴ Ntangu yayi, ba yufulaka, diaka, kana ya ke vwanda diaka. . . “Mpangi Branham, nge ke vwanda diaka na balukutakanu ya kubeluka ya nzutu na tabernacle, na bakuswasikisa mabanza?” Ve. Ve. Kuswasikisa mabanza ke pesama na—na conseil ya beto yankaka. Beto ke na Mpangi Neville ntangu yayi awa yina ke na dikabu ya profesu, yina ke pesaka profesu samu na bambevo mpe ke sala ti bawu kuzaba mambu yina ba ke na yawu nsatu ya kuzaba. Mpe beto ke na mpangi-bakala mosi na nkumbu ya Higg-. . . Higginbotham, yina. . . vwandaka administrateur, yina vwandaka kisadi mosi ya kwikama kuna na conseil. Mu ke mona yandi ve na suka yayi, kasi yandi ntangu nionso kele na dikabu ya kutuba na bandinga ya malu-malu. Mpe ya ke na mama mosi ya fioti na nkumbu ya Arganbright, mwa mpangi-kento mosi ya lutondo yina ke na dikabu ya kutendula bandinga.

¹⁵ Mpe bansangu yayi me siamisama ti ya ke ya Nzambi, samu ya ke kwisaka ve na nganda ya ntumunu, ya ke vwandaka kaka na ndonga. Mpe kaka na ntangu makabu yayi ke banda na kuyikama, beto ke meka na ku—kusala ti. . . beto ke sungika yawu na mutindu ya mbote ya kusala, ya dibuundu. Mpe mu fwana mona bawu na nswalu nionso, na mutindu ti—ti balukutakanu kusalama na mutindu ya kulunga na ndonga ya Mfumu, na mutindu ya kulunga mingi.

¹⁶ Kasi bantu yayi ya luzolo, mutindu me tuba mfinangani ya munu, Mama Wood, yina me tula microphone na zulu awa, mpe magnetophone kuna na manima, samu na kubaka lukutakanu na bande, samu na kubaka bansangu yayi na bande, mpe samu na kusonika yawu, mpe kutala kana ya ke ya mbote to ve. Beno me mona? Ya ke mutindu yina ya ke talaka yawu. Mu zaba ti Mama Wood kele kento mosi ya kieleka. Mpe yandi ke tubaka na munu mambu mingi yina ba zabisaka na ntwala, yina ke na kusalama.

¹⁷ Ntangu yayi, na yawu beto ke vutula matondo mingi samu na yawu. Yawu ke sadisa munu mingi na yinzo! Ntangu mu ke vutuka na yinzo, kuna. . . Kuswasikisa mabanza ya profesu ke lembisaka munu mingi, mpe, na yina, Nzambi me tinda munu lusalusu samu na yawu, na nzila ya profesu, mpe kutuba bandinga ya malu-malu, mpe ntendulu, yina kele profesu. Ya ke, profesu, kutuba bandinga ya malu-malu. Ya ke na bantu zole ke pesaka profesu. Mosi ke kutuba, yina yankaka ke bakula yina yankaka ke na kutuba na bandinga yina ba me zaba ve. Mpe ntangu yayi beto ke vwanda. . . Beto ke vwandaka na yawu konso kilumbu, na balukutakanu nionso awa ntangu beto ke vwandaka na bandonga ya bisambu na lukutakanu.

¹⁸ Ntangu yayi, muntu mosi lendaka yufula, ti... samu na dikabu. Yinga, mu ke na yawu kaka. Kasi mutindu, mutindu mosi kaka mu ke sadila yawu, ke kele na masolo ya munu mosi, yina mu ke vwandaka na yawu. Mpe, samu na kuzwa yawu, mu ke kwikila ti ba me tula yawu na tableau kuna na manima, beno fwana baka muswa mpe kuwakana kilumbu, na Billy Paul, mwana ya munu ya bakala, samu na yayi to balukutakanu yina ke kwisa na manima ya yayi. Kuna na bisika ya kulonga, bisika nionso, beno fwana vwanda na mwa kalati yina Billy Paul ke pesa beno. Kana ya ke na kima mosi na luzingu yina beno lenda bakula ve, mpe beno zaba ve wapi mutindu kubasika na yawu, mpe beno ke na kusosa ndwenga ya Mfumu, na yina beno bika... Beno mona Billy Paul, mwana ya munu ya bakala, yina kele secrétaire ya munu, mpe yandi ke pesa beno mwa kalati mosi ya fioti, mpe yandi ke pesa beno kilumbu, na ntangu.

Na manima ntangu beto ke vwanda na masolo yina, na yina ya ke vwanda na ntangu yina beto ke vwanda kintwadi, kaka beno na munu. Mpe kana ya ke bakento, beno ke kwisa na munu na kento ya munu. Na manima beno... Beto ke mona, beto ke sosa Mfumu mpe beto ke lomba Yandi yina beno fwana sala.

¹⁹ Ntangu yayi, yankaka, mambu ya fioti mpe nionso yina, me pesama na Mpangi Neville, mpe Mpangi Higginbotham, na Mpangi-kento Arganbright, mpe bayina yankaka ke tubaka na bandinga mpe ke tendulaka yawu, yina kele awa na dibuundu.

²⁰ Na yina, beto ke sala mutindu na nzietolo. Mu ke kwikila ti ya vwandaka Jetro, yina tubaka na Moise kilumbu mosi, beno me mona, "Beto baka mwa bakuluntu." "Mpe ba bakaka Mpeve ya Nzambi na Moise mpe ba tulaka yawu na zulu ya bakuluntu makumi sambwadi, mpe ba pesaka profesi. Kasi bima ya nene mpe ya mpasi vwandaka kwisa kaka na Moise." Ntangu yayi, beto ke Moise ve, to beto ke bakuluntu yayi ve, kasi beto ke na kusadila kaka Yehowa Nzambi, na Dikunzi ya Tiya mosi yina ke na kutwadisa beto na Yinsi ya nsilulu.

Na yawu, na yina, yinga, ya ke vwanda diaka na yankaka, ya ke vwanda na balukutakanu mpe ya ke vwanda na ntendu... Kuswasikisa mabanza ke kwisa. Yina ke pesa munu ntangu ya mbote ya kusambila mpe kulonguka, bilumbu yina mu ke zaba ti mu ke vwanda na masolo, mpe mu ke kubama samu na yawu.

²¹ Ntangu yayi beno bambuka moyo, Billy Paul Branham, secrétaire ya beto na kisika ya kulonga, ke... Ya ke na zulu... Ba me tula luzabusu na tableau kuna na manima, na ba-administrateur. Mu ke na luzabusu mosi awa samu na kuzabisa yawu, mpe kutuba na bantu ti ba lendaka kutanga yawu na tableau, ntangu ba ke basika.

²² Ntangu yayi, ntangu yayi, na suka yayi beto ke vwanda na dilongi mosi ya nene, mpe na nkokila yayi beto ke meka na kulandila yawu. Mpe kana Mfumu kuzola, na Lumingu ke kwisa,

diaka, beto ke landila yawu. Mu zabaka ve ti ya vwandaka mudindu mingi na ntwala mu banda na kulonguka yawu. Mpe ya ke kaka mansweki samu na munu, ntete, mpe yawu yina mu ke tala kaka na Mfumu.

²³ Ntangu yayi, beno yina ke na ba-ba-Biblia ya beno, beto baka Psaumes 99, 99. Mpe mu ke tanga nzila ya ntete, dibuundu ke tanga nzila ya zole, na yina beto nionso kintwadi beto ke tanga nzila ya nsuka. Beto ke landila yawu; munu, nzila ya 1; dibuundu, nzila ya zole; munu, nzila ya 3; dibuundu, nzila ya 4; tii na nzila ya nsuka, na manima beto nionso ke tanga yawu kintwadi. Beto telama na ntangu beto ke tanga Ndinga ya Nzambi.

MFUMU kele ntinu; bantu ke tekita: yandi me vwanda na kiti ya yandi ya kimfumu na kati ya ba-cherubin; ntoto ke ningana.

MFUMU kele ngolo na Sion; yandi ke yalaka bantu nionso.

Konso muntu fwana kumisa nkumbu ya yandi ya nene mpe ya lukumu; samu ya kele ya santu.

Nge ntinu ya ngolo mpe nge ke zolaka ludedomo; nge me nataka mambu ya kieleka, nge nataka mambu ya kieleka mpe ya mbote na Jacob.

Beno pesa lukumu na MFUMU Nzambi ya beto, mpe beto fukama na ntwala ya kiti ya yandi ya kimfumu; samu yandi kele santu.

Moise na Aaron vwandaka banganga-Nzambi, mpe Samuel vwandaka kusambila yandi; ba vwandaka kubokila MFUMU, mpe yandi pesaka bawu mvutu.

Kuna na kati ya matuti yandi vwandaka: yandi vwandaka kutuba na bawu, mpe ba vwandaka kulanda bansiku nionso yandi pesaka bawu.

MFUMU Nzambi ya beto, vwandaka kuwila bawu bantu ya nge: nge vwandaka kusonga bawu ti nge ke Nzambi ke wilaka bantu mawa, kasi nge vwandaka kupesa bawu kitumbu samu na masumu ya bawu.

Beno pesa lukumu na MFUMU Nzambi ya beto, mpe beno sambila yandi kuna na mongo ya yandi ya santu; samu MFUMU Nzambi ya beto kele santu.

²⁴ Beto kulumusa bayintu ya beto.

Ya kieleka, Mfumu, Bandinga yayi me sonama mpe salama na kisadi ya Nge, David, na Psaume samu na Nge. Nge ke vwandaka na kati ya ba-cherubin. Nge ke ya santu, mpe mongo ya Nge ke ya santu. Beto me pusana na Menga ya Mfumu Yesu ya kutiamuka na bantima ya beto, na mabanza ya kukondwa mvindu, na lukwikilu mpe kivuvu ti beto me kwisa

na Mvwandulu ya Nzambi ya beto. Bika ti nkonga ya bantu yayi nionso kuvwanda na luzitu. Zibula makutu ya beto ya lubakusu. Tuba na nzila ya beto, na ndwenga, ti beto lenda zaba wapi mutindu beto fwana zinga na bilumbu yayi mpe na Mvwandulu ya Nge.

²⁵ Beto ke lomba Nge, Nzambi ya beto, na kumonisa na beto mambu yayi ya kinsweki yina me bumbama bamvula yayi nionso, mutindu beto ke pusana na mosi ya Bandinga ya kuvedila, ya kieleka. Nge tubilaka yawu ntangu Nge vwandaka awa na zulu ya ntoto, mpe tubaka, “Yandi yina ke tanga, bika yandi bakula.” Na yawu, na luzitu nionso beto ke kwisa na Nge, Mfumu, mpe samu na kusosa ndwenga ya Nge, samu beto me zaba ve yina beto fwana kutuba. Beto me kukubika mwa Masonuku awa, mpe na luzitu nionso mpe ya muvimba beto ke kukipesa na Nge samu na kuzwa mvutu, samu na lukanu yankaka ve kasi samu beto kuzaba ngunga yina beto ke na kuzingaka, ti beto kukubama samu na mambu ya nene ke na kukwisa na ntwala. Nge lendaka pesa yawu na beto, Mfumu? Na Nkumbu ya Yandi Yina longaka beto nionso ti beto lendaka sambila mutindu yayi:

Tata ya beto yina kele na mazulu, Bika nkumbu ya nge kuvwanda ya santu.

Bika kimfumu ya Nge kukwisa. Mpe luzolo ya Nge kusalama na ntoto, mutindu yawu ke salama na Mazulu.

Pesa beto bubu yayi madia ya beto.

Mpe lemvokila beto yimbi ya beto, mutindu beto mpe ke lomvokilaka bayina ke salaka beto yimbi.

Kubika beto ve kubwa na mpukumunu, kasi katula beto na yimbi; Samu ti Kimfumu, mpe ngolo, mpe nkembo, kele ya Nge bamvula na bamvula. Amen.

²⁶ Beto kuvwanda. Ntangu yayi, kana muntu zola kukatula kazaka ya bawu, beno sala yawu. Mpe bayina me telama na balweka ya kibaka, kana makulu me sala mpasi, na yina, beno vwanda na kimpwanza ya kukwenda kisika yankaka.

²⁷ Mpe ntangu yayi, mu banza, kana bana zola kwenda na bivinga ya bawu, to ba me basisa dezia? [Mpangi Neville me tuba, “Ve, ba me basika ntete ve. Beto ke vwanda na yawu ve na suka yayi, bantu kele mingi.”—Mu.] Pasteur me tuba ti bantu me fuluka na bivinga, na yawu beto ke vwanda ve na lukolo ya Lumingu samu na bana. Mpe beto ke vwanda na kiese kana beno bana ya fioti ntangu yayi ke vwanda na ngwisani na beto, mutindu na suka yayi beto ke na, beto ke banda Nsangu mosi ya nene, ya mfunu mingi yina mu ke kwikila ti ya ke vwanda na mfunu mingi samu na tata mpe mama ya beno, mpe bankundi

ya beno ya luzolo yina kele awa, ata mpe samu na beno bana ya fioti. Na yawu, beto ke zonzila yawu na luzitu nionso.

²⁸ Kana Mfumu kuzola, na suka yayi beto ke zonzila dilongi ya basabala makumi sambwadi ya Daniel. Mpe na suka yayi beto ke tubila Daniel na kimpika, mpe Gabriel yina ke pumbuka samu na kukwisa kupesa yandi bandongosolo samu na mambu ke kwisa na ntwala. Na ntangu Daniel vwandaka sambila, Gabriel, Wanzio, kwisaka kupesa yandi bandongosolo.

Na nkokila yayi, mu zola tubila balukanu sambanu ya nkwezulu ya Yandi, malongi sambanu ya luswaswanu mu ke longu na nkokila yayi, yina nataka nkwezulu ya Gabriel.

²⁹ Lumingu ke kwisa, kana Mfumu kuzola, mu zola tula kikuma mpe ntangu ya Bansungi Sambwadi ya Dibundu, mpe yinki ntangu ya kele, mpe wapi kisika beto kele bubu yayi. Ya ke vwanda na Lumingu ke kwisa na suka, kana Mfumu kuzola.

³⁰ Ntangu yayi, kikuma yawu yayi. Mu me nata mwa masonama ya Bansungi ya muna ya nsuka. Mpe na suka yayi mu zola sala ngwisani na yina beto me mona, samu yayi ke na bande magnetique yina ke kwenda na yinza ya muvimba, bayinsi mingi. Mpe, ntangu nionso, kikuma mu ke vutukisaka fioti na manima, ntangu yankaka muntu mosi ke kuwa bande na mbala ya ntete, mpe yandi ke bakula ve yina mu me tuba ntangu mu ke tubila kima yina mu tubilaka na ntwala.

³¹ Bangonda mingi me luta ntangu yayi beto ke longuka Buku ya Apocalypse, Luzayikisu ya Yesu Klisto. Beto me mona bansungi ya dibundu. Makapu tatu ya ntete ya Apocalypse vwandaka bansungi ya dibundu. Na yina ba zangulaka Jean na kapu ya yiya mpe kapu ya tanu, mpe ba talisaka yandi mambu yina—yina ke salama na ntwala. Ntangu yayi, na kapu 6, yandi me kulumuka diaka na ntoto, samu na kumona mambu yina ke salama kubanda kapu 6, nzila ya ntete, tii na kapu 19 mpe nzila ya 21. Ya kele awa Bidimbu kele, Bampasi, Bakiadi, bampasu, kento na kati ya mwini, mpe dalango ya mbwaki yina ba me losa, kutula kidimbu ya nkama na makumi yiya na yiya ya mafunda, mpe bima yina nionso.

³² Yayi vwandaka sabala mosi mu me longuka mingi. Mazono, kilumbu ya muvimba, ya vwandaka mu basika na kivinga, mu vwandaka meka na kulonguka. Mpe ya ke na kima mosi na ntangu me luta, mingi ya bantu yina ke kwisaka awa kubanda ntama, yina mu me longaka, mu tubaka kaka, “Kuna ya ke na basabala makumi sambwadi ya Daniel,” kasi mu mekaka ve na kusimba yawu, samu na kutendula yawu. Kasi ntangu yayi, na lemvo ya Nzambi, mu me baka lukanu ya kulomba lemvo na ntwala ya Nzambi, ti mu lendaka longa yawu na bantu. Mpe awa mu me mona ti ya ke na mambu yina mu me zaba ve.

³³ Mpe, na yina, mu—mu me tanga buku ya Docteur Larkin, buku ya Docteur Smith, masonama ya Docteur Scofield, malabu

ya mutindu na mutindu ya bantu bisika nionso, mpe na yina mu lenda ve kuvukisa diambu yango na kubakaka nionso yina. Beno me mona? Na yawu, sabala yayi mu me baka lukanu, mu kwendaka na yinzo ya mikanda na Kentucky, samu na kutanga mwa astronomie ya ntama ya manaka mpe ya ntangu, mpe lokotaka na bayinzo ya mikanda, mpe nionso yina, babuku nionso ya ntama mu lendaka lokota, mpe mu salaka yina mu lendaka sala na mutindu ya kukikulumusa, mpe na kutulaka kieleka kivuvu na Yesu Klisto samu na kutalisa yawu na munu.

Samu, mu ke zola ve kuzaba mambu yayi samu na kutuba, “Mu me zaba *yayi*, mpe mu me zaba *yina*.” Yandi zaba ntima ya munu. Yandi ke kuwa munu. Kasi mu zola zaba yawu, ti mu lendaka temuna bantu ya Yandi, na yina mu ke kwikila ti Yandi ke pesa munu yawu. Mu me zaba yawu ntete ve, kasi mu ke tula kivuvu na Yandi samu na Lumingu ke kwisa, samu yina ke vwanda kitini ya mfunu mingi, Lumingu ke kwisa, samu na kuzaba mpe kutula basabala makumi sambwadi yina.

³⁴ Nionso ke na kisika ya ya yawu. Mpe na kusalaka yayi, na kutulaka yawu nsongi na nsongi, ya ke pesa kima ya kieleka ve, ya ke pesa kima ya mbote ve. Ya lendaka ve. Mpe, na yina, mu—mu lendaka vwandaka ve na kiyeka kutula yawu mbote-mbote, kasi mu ke tula kivuvu na Mfumu samu na yawu.

³⁵ Mpe mu ke bambuka moyo ya Salomon ntangu mosi ya vwandaka sambila mpe vwandaka kulomba Mfumu Nzambi kana Yandi lendaka kupesa yandi ndwenga, samu na yandi mosi ve, “samu yandi kuzinga mingi ve, samu na luzingu ya yinda ve, samu kuvwanda na bimvwama ve,” kasi samu yandi vwanda na ndwenga ya kuzaba wapi mutindu ku—ku—kusambisa bantu ya Nzambi. Mpe Nzambi zitisaka kisambu yina, mpe pesaka na Salomon ndwenga yina, samu ya vwandaka samu na bantu ya Yandi. Mpe yawu yina mu ke lomba na Nzambi na kupesa muswa ti munu kuzaba yina zola kutuba basabala makumi sambwadi yayi, samu mu me zaba ti ya ke manaka ya kieleka samu na nsungi yayi beto ke na kuzinga. Mpe, na yina, mu zola zaba yawu; samu na munu mosi ve, mu ke . . . samu na munu mosi ve. Na yawu, mu zola zaba yawu. Mu ke tuba ve mutindu yayi, “Samu na munu mosi ve,” samu mu me zola yawu ve munu mosi. Mu zola zaba yawu, samu mu zola zaba wapi sika beto ke na kuzinga mpe yinki ntangu beto ke na kuzinga. Mpe, na yina, mu zaba ti ya ke kima mosi me pesama.

³⁶ Mpe bantu mingi me basisa mabanza ya bawu, mpe ba me tuba ti ya me salamaka kabanda ntama. Muntu mosi, mu vwandaka kutanga, tubaka ti nionso yayi salamaka na 1919, ya basabala makumi sambwadi. Mbote, ya vwandaka mutindu yina ve.

Na yawu, na manima ya basabala makumi sambwadi, na manima ya basabala makumi sambwadi, nionso me mana. Na

yawu beto—beto zola ve . . . Beto zola zaba Kieleka. Mu ke na kulomba na Nzambi na kupesa munu Kieleka.

³⁷ Ntangu yayi, samu na kusimbisa yayi, samu na kuvutukila, mu zola vutukila fioti yina beto me tuba. Na yawu, na yina, mwa masonama yina mu me sonika, yina beto ke na yawu na kapu 5, 4 na 5, na yawu bantu ke bakula. Ntete, na ntwala beto sala yawu, mu zola sala ngwisani, samu beno simba kubanda na 4 . . .

Ntangu yayi, beno bambuka moyo, kapu ya 3 vwandaka Nsungi ya Dibuundu ya Laodicée, mpe Dibuundu mataka na nsuka ya Laodicée.

³⁸ Ntangu yayi, mu vwandaka meka na kutendula kima mosi na kento ya munu samu na yawu. Mu bakaka Becky, mwana ya munu ya kento, na ba-dictionnaire nionso ya mutindu na mutindu mpe bima yina beto lendaka kuzwa. Ba lendaka pesa mvutu ve. Mu me baka dictionnaire ya Biblia. Mu bakaka dictionnaire ya ntama ya ba-Grecque. Mu—mu bakaka Websters na mingi yankaka, ba-dictionnaire ya bilumbu yayi. Ata mosi ve na kati ya bawu lendaka kupesa ata mpe . . . kutuba bandinga to kupesa mvutu, na mutindu nionso.

³⁹ Kento ya munu tubaka, “Yinki mutindu nge ke vingila ti bantu ya beto, yina kele bamputu, mpe mingi ya bawu me longokaka ve mutindu beto, kubakula mambu ya mutindu yayi?”

Mu tubaka, “Nzambi ke pesa munu mvutu.”

⁴⁰ Mu ke kipe ve wapi mutindu ya ke mpasi, Nzambi lenda kubuka yawu mpe kukumisa yawu kukondwa mpasi. Samu beto ke . . . kitini ya bantu yina ke na kuingila, ke na kusambila samu na kilumbu yina mpe ngunga yina. Mpe meso ya beto ke na kutala na Zulu, mpe beto ke na kutala Nkwizulu ya Yandi. Mpe mu ke kwikila kaka ti Yandi ke talisa yawu na beto. Ntangu yayi, ya ke tuba na beto ve kilumbu to ngunga, samu muntu mosi ve ke zaba yawu, kasi ya kieleka ya ke tuba na beto kilumbu ya sabala beto ke na kuzinga, kana beto lenda kaka kusimba yawu.

⁴¹ Ntangu yayi, na kapu 4, ba zangulaka Jean na mbala mosi, na manima ya Dibuundu. Jean, na kutombokaka, yandi monaka nsungi ya Dibuundu ya movimba. Mu zola telema kisika yayi, mwa ntangu fioti, samu na kutuba, ti: bantu mingi ke na kuingila kima ya nene, ya nene mingi, ya ngolo kusalama, na nsungi ya Bantu ya makanda, ya kieleka ba ke na kifu. Nsungi ya Dibuundu, mpe nionso yina ke salama na ntangu ya Bantu ya makanda, kele kubanda Apocalypse 1 tii na Apocalypse 3, vukisa. Na manima Dibuundu me mata na Enlevement, mpe yayi yankaka, tii na kapu 19, kele yina ke salama na dikanda ya ba-Juif, na manima Dibuundu me mata. Mpe ya ke ntangu ya Bampasi ya nene, kima mosi ve ke salama na Bantu ya makanda; kaka boucherie, mpe nionso yina, mutindu beto ke mona yawu ntangu beto ke kuma kuna.

42 Kasi Dibuundu, Yawu mosi, me kwenda na 13 . . . Na nzila ya nsuka ya kapu 3 ya Apocalypse, ntangu Nsungi ya Dibuundu ya Laodicée ke suka, yina vwandaka ya nsuka.

43 Mpe beto me baka konso nsungi ya dibuundu, konso ntangu, konso kima yina salamaka, konso mbwetete, konso munatinsangu, nkadulu ya bawu, yina ba salaka, mpe beto landila yawu na kati ya masolo tii na yina ya nsuka, ba me yema kifwani yango kuna na tableau, na lweka ya kibaka. Mpe ntangu beto manisaka, Mpeve-Santu kotaka mpe salaka selekele ya mutindu mosi na kibaka, mpe me talisa yawu Yandi mosi na beto nionso awa.

44 Ntangu yayi, na kusalaka mutindu yayi, mu ke na kivuvu, na nsuka ya yayi Yandi ke kwisa na kima ya nene mingi mpe ke talisa yawu diaka na beto ti beto me kuma na ntangu ya nsuka.

45 Bantu yikwa na kati ya beno me kuwa Kennedy . . . nsangu ya Mfumu ya yinsi Kennedy, malabu mpe nionso yina? Bantu yikwa kuzaba diambu yayi zabisamaka na ntwala, ti na kilumbu ya 1 ya Ngonda ya ntete, ya zabisamaka na ntwala ti Etats-Unis na Russie ke vwanda kaka fututu ya volcan? Yawu yina beto ke na yawu nsatu. Ntangu me luta mingi ti beto lenda banza yawu. Beno me mona? Na yawu, kana beto me kuma pene-pene mingi ti ata mpe bantu ya ntoto yayi ke na kuzabisa na ntwala diambu yayi ya nene ke salama, kulutila mbote beto vwanda na bukebi, mambu nionso ya kusungama, kufunguna nionso, nionso kuvwanda ya kukubama, samu beto zaba ve wapi ntangu Mfumu ya beto ke bokila beto. Mpe ntangu Yandi ke bokila, “Mata na zulu mingi,” kulutila mbote kuvwanda ya kukubama. Mpe yina ke salama na ngunga yina beno ke banza ve.

46 Reveil ya nene ya ba-Pentecotiste me mana ntangu yayi. Beto ke mona yawu bisika nionso, mouvement ya nene ya nsuka. Nsangu me longama. Mambu nionso me kubama ntangu yayi, ya ke na kuingila. Ba me tula kidimbu na Dibuundu mpe ba me tula yawu na lweka. Bantu ya yimbi ke na kusalaka diaka yimbi. Mabuundu ke na kukuma diaka na mambu ya nganda. Basantu ke na kukuma pene-pene mingi na Nzambi. Makabu ya Mpeve me banda na kukuma mingi na kati ya mwa bimvuka. Beto me kuma na ntangu ya nsuka. Oh, mu ke zolaka nkunga yina beto vwandaka kuyimba na yinzo-Nzambi.

Mu ke vingila nkwezulu ya kilumbu yina ya
kiese ya Millenium,
Ntangu Mfumu ya beto ya kusakumuka ke
kwisa kubaka Kento ya Yandi ya makwela ke
na kuingila;
Oh, ntima ya munu ke na kudila, na mpwila
samu na kilumbu yina ya kukuula,
Ntangu Mvulusi ya beto ke kwisa vutuka diaka
na ntoto.

⁴⁷ Na kuvingilaka ngunga yina! Ntangu yayi, na kapu 5 mpe banzila tanu, beto me mona, na dilongi ya beto me luta, yina beto tubilaka Tata Musumbu, yina beto monaka ti ya vwandaka Klisto. Beto fwanikisaka yawu na Ruth: lukanu ya Ruth; kisalu ya Ruth; kupema ya Ruth. Lukanu, vwandaka kunungisama; kisalu, ntangu ya vwandaka kuyilama, kusantisama; kupema, vwandaka na Mpeve-Santu, tii Mukembo ya Makwela kwisaka. Ya ke kitoko mingi!

⁴⁸ Dibuundu me luta na nzila ya John Wesley, kunungisama, to... Martin Luther, kunungisama; na nzila ya John Wesley, kusantisama; na nzila ya Pentecote, mbotika ya Mpeve-Santu; mpe ntangu yayi, kupema, na kuvingilaka Nkwizulu ya Mfumu ya Yandi. Na mutindu ya kulunga!

⁴⁹ Tata Musumbi ya beto, bakuluntu vwandaka ya kusungama ntangu ba bokilaka Yandi Mwana-dimeme, mutindu zuzi, ya zolaka kukuma Nkosi. Yandi vwandaka Mwana-dimeme, beno zaba, na Buku ya kukangama na bidimbu sambwadi. Ntangu ba bakaka Buku, kisalu ya movukisi kumanaka.

⁵⁰ Ntangu yayi, na kapu ya 3 Dibuundu me mata, kasi ntangu yayi mpulusu fwana monisama, wapi mutindu ba kuulaka—kuulaka Dibuundu, luzayikisu ya yina salamaka na ntangu ya nsungi ya Dibuundu. Beno me mona, Dibuundu me kwenda, na yawu Yandi ke na kutalisa ntangu yayi, na kapu 5, wapi mutindu Yandi salaka yawu, yina salamaka, wapi mutindu Yandi tulaka Dibuundu kidimbu. Luzayikisu ya Nkumbu ya Yandi; mbotika ya masa, na kusadilaka Nkumbu ya Yandi; Luzingu ya Kukonda nsuka; difelo ya Seko ve; nkuna ya nioka; lukengolo ya Seko; malongi nionso ya nene, predestination, ya Dibuundu, yina ba me monisa na Dibuundu. Yandi ke na kutalisa wapi mutindu Yandi salaka yawu.

⁵¹ Ntangu yayi, Tata ya beto me baka Buku ya Mpulusu yina me kangama na bidimbu sambwadi na maboko ya Munkwa ya kisina. Amen! Nani ya vwandaka, beto me mona, vwandaka Munkwa kisina? Nzambi Yandi mosi. “Mpe Mwana-dimeme kwisaka mpe bakaka Buku na diboko ya kibakala ya Yandi yina vwandaka na Kiti ya kimfumu.” Nani vwandaka Mwana-dimeme? Musumbi, Tata Musumbi ya beto, Tata ya Dibuundu, Yina me kwisa mpe kukuulaka Israel.

⁵² Ntangu yayi beto ke kota na yawu na suka yayi. Israel vwandaka ya kukuulama, kasi ya salaminaka bawu ve, samu ba losaka Yandi. Kasi, Dibuundu me kuyamba mpulusu ya yawu, mpe Yandi kele Tata Musumbi ya beto. Mutindu Boaz fwanaka kukuula Naomi, samu na kuzwa Ruth, muntu ya Moab, nzenza, Muntu ya makanda; na yawu Klisto kukuulaka Israel, salaka mpulusu, mpe losamaka.

⁵³ Beno ke bambuka moyo pardo, yina muntu yina ba bulaka munduki, yina mu ke tubila beno ntangu nionso? Na guerre de

sécession, ntangu... Yandi vwandaka muntu ya mbote. Yandi zabaka diambu ve, mpe ba bwisaka yandi. Na yina, yandi vwandaka kubwa na lweka mosi, ti yandi tinaka na ntangu ya bitumba. Mpe ba bwisaka yandi mpe ba zolaka kufwa yandi na munduki. Mpe muntu mosi kwendaka na Ntwadisi ya yinsi Lincoln mpe yandi tubaka, “Tata Lincoln, muntu yayi kele Muklisto. Yandi vwandaka na boma. Mwana-bakala yayi, mu zaba bantu ya yandi. Yandi vwandaka kaka na boma. Yandi zolaka kusala yimbi ve. Yandi tinaka.” Yandi tubaka, “Tata Lincoln, ya ke na maboko ya nge. Ya ke kaka nge lendaka lolula yandi.”

Tata Lincoln lokotaka kitini ya papié mpe kilapi ya yandi, mpe sonikaka nkumbu ya yandi, “Ya me lemvokila na muntu *kingandi*. Abraham Lincoln.”

Yandi kwendaka mbangu na boloko, mpe yandi tubaka, “Yawu yayi. Mu me kuzwa pardo ya nge.”

⁵⁴ Mpe muntu yango kutubaka, “Mu me manga na kutala yawu. Ya zolaka vwanda na kidimbu ya nene na zulu ya yawu. Ya zolaka vwanda na bima mingi. Nge ke na kuseka munu kaka. Ya ke Abraham Lincoln ve. Muntu nionso lendaka mekula nkumbu ya yandi. Kasi ya zolaka niemama na kidimbu ya yandi, mpe nionso yina, kana ya me katuka na yandi.” Mpe muntu yango kundimisaka yandi; ata mutindu yina muntu ya boloko banzaka ti ya vwandaka sala nsaka, mpe yandi kwendaka.

Kilumbu yina landaka, ba kufwaka yandi na munduki. Na manima ba kufwaka yandi na munduki, na yina cour fédérale ya lusambusu kwisaka, samu Abraham Lincoln, bangunga makumi zole na yiya na ntwala ba kufwa bakala yango na munduki, yandi sonikaka nkumbu ya yandi ti bakala yayi ba me lolula yandi. Na manima luyalu kufwaka yandi, na mutindu nionso. Yinki ntangu yayi? Na yina cour fédérale ya Etats-Unis, tubaka, bakaka lukanu yayi landila ba-cour Fédérales, ya tubaka, “Lemvo kele lemvo ve kana ba me yamba yawu ve mutindu lemvo.”

⁵⁵ Mpe Yesu kukuulaka Israel na Calvaire. Kasi ya vwandaka lemvo ve samu na bawu, samu ba yambaka yawu ve mutindu lemvo. Kasi, na dilongi ya beto ntangu yayi na basabala makumi sambwadi, beto me mona ti ba ke vutuka samu na kuyamba lemvo ya bawu. Kasi, Yandi kukuulaka Dibuundu, na yina beto me kuzwa mulemvo samu beto me yamba Menga ya Yesu Klisto mutindu pardo ya beto.

⁵⁶ Ntangu yayi, beto me mona ti Yandi vwandaka Tata Musumbi, mpe Yandi bakaka Buku na diboko ya Munkwa ya kisina. Ya ke mukanda ya munkwa kima samu na mpulusu. Beto me mona yawu. Beno ke bambuka dilongi yango? Ya ke mukanda ya munkwa kima samu na mpulusu. Ya ke mukanda ya munkwa kima yina ba lenda nwanisa ve, yina Nzambi pesilaka luzingu samu na lufwa, na disamba ya Eden. Na yina, Yesu, Muntu

ya mbote, kufwaka mpe bakaka mukanda ya munkwa kima, mpe vwandaka na kiyeka ya kubuka Bidimbu, kumonisa yina vwandaka na kati ya Yawu; mpe pesaka difwa, yina vwandaka ya Yandi, na bantu ya Yandi. Luzingu ya Kukonda nsuka, ti Yandi bakaka difwa na kusalaka mutindu yina, Yandi pesaka beto Luzingu ya Yandi Mosi, na Calvaire, mpe kabulaka yawu na kati ya beto na nzila ya Mpeve-Santu. Amen! Muntu mosi (ata fioti ve) vwandaka na kiyeka ya kukwisa ata mpe samu na kubanza zola yina ya vwandaka na yawu, yina Yandi salaka!

⁵⁷ Satana, yina vwandaka kusimba yawu ntete samu na kubwa na disamba, ba me kanga yandi mpe ba me losa yandi na Kiziba ya Tiya. Bilumbu ya yandi me kumana.

⁵⁸ Yesu, na Nsangu ya mbote, vwandaka na bisalu yiya. Beto me mona yawu. Mwana ya David, kilandi ya Kiti ya kimfumu; Mwana ya Abraham, difwa ya kimfumu; Mwana ya muntu, difwa ya ntoto; Mwana ya Nzambi, difwa ya bima nionso. Difwa ya kimfumu!

⁵⁹ Na Ngwisani ya Ntama, ba lendaka ve—lendaka ve kusimba kimvwama kulutila bamvula makumi tanu. Ba lendaka pimisa yawu ve na munkwa ya yawu ya kisina kulutila bamvula makumi tanu. Mpe na kilumbu ya makumi yiya Yandi futaka ntalu. Na kilumbu ya makumi tanu, mpulusu mpe ngolo yina vwandaka na Dibundu, yina ba zimbisaka na disamba ya Eden, ba kukuulaka yawu, mpe tindaka yawu na beto na mbotika ya Mpeve-Santu, na kilumbu ya makumi tanu.

⁶⁰ Na yina beto bakaka yayi, buku. Beto me baka babuku, wapi mutindu ba pesaka buku yayi na diboko ya Yandi. Wapi mutindu Jérémie, na Jérémie 32:6, kisoni ya yandi, Hanameel, bikilaka yandi difwa mosi. Mpe ba kwendaka na kimpika. Na yina, beto ke landa yawu kuna, na yandi, na suka yayi: kimpika. Mpe ba bumbaka yawu na nzungu ya ntoto; yina ke talisa ngolo ya Nzambi, mpe babuku mpe binsweki ya Nzambi, me zabana, na kati ya ntima. Manaka ya beto ya mpulusu, yawu mpe ba bumbaka yawu na banzungu ya ntoto, Nkumbu ya Yesu mpe luzayikisu.

⁶¹ Beto me mona ti yayi vwandaka ya kukanga na Bidimbu Sambwadi, mpe konso Kidimbu vwandaka ya kubalula. Mpe na ntangu luzayikisu kupesamaka, Yandi vwandaka benda Kidimbu, mpe vwandaka zibula yawu mpe kutanga yina Kidimbu yina tubaka. Na yina Yandi zibulaka yina yankaka, buku, mpe tangaka yina Kidimbu yina tubaka. Yandi zibulaka yina yankaka, yandi bendaka yawu mpe monaka yina vwandaka tuba Kidimbu yina, mpe yina vwandaka luzayikisu. Yawu yina ke vwanda kieleka Bidimbu Sambwadi ya beto, yina beto ke zonzila ntama mingi ve, beto ke tula kivuvu, ti ya ke vwanda mutindu yina. Konso Kidimbu, ntangu ba ke katula yawu na Buku, ya ke zibuka, mpe ya ke talisa kieleka yina ke salama.

⁶² Beto ke mona ti ya ke “sambwadi,” tanu na kati ya manaka ya mpulusu. Tanu kele ntalu. Mpe ya ke na ba-sambwadi tanu: Bidimbu Sambwadi, Bampeve Sambwadi, bawanzio sambwadi, Bampungi Sambwadi, mpe bansungi sambwadi ya dibuundu. Na yawu, beno me mona, ba-sambwadi tanu kele lemvo. Tanu kele lemvo, mpe sambwadi kele kulunga. Na yawu ya ke na kutambula kieleka na mutindu ya kulunga, beno me mona. Mbote mingi.

⁶³ Mumbandu, konso Kidimbu yina ba me buka na kati ya Ndinga ya Nzambi, ke talisa na muntu ya nsungi yango, yinki nsungi beto ke na kuzinga, mpeve ya nsungi yango, dibuundu ya nsungi yango. Apocalypse 10, na nsuka, beto ke mona ntangu ba me buka Kidimbu ya nsuka, beto ke mona ti Wanzio me telama dikulu mosi na ntoto, mpe dikulu yankaka na nzadi, na maboko ya Yandi ya kutelemisa na Zulu, na arc-en-ciel na zulu ya yintu Yandi, ke zenga ndefi na Yandi yina ke zinga mvula na mvula, ti ntangu kele diaka ve, na Kidimbu yayi ya nsuka. Mpe beno vingila ti beto baka Bidimbu yayi mpe beto tala yina Kidimbu yango kele.

Na manima beno ke mona basabala sambwadi, na manima beno ke mona yina Bidimbu kele, “Ntangu kele diaka ve,” mpulusu me mana, ntangu yayi Yandi kele Nkosi mpe Zuzi. Yandi kele Mvulusi ya beno na suka yayi, kasi kilumbu mosi Yandi ke vwanda Zuzi ya beno.

⁶⁴ Nzila ya 8 tii na 1...na nzila ya 14 ya kapu 5, ya ke luzayikisu ya ntangu yina ba ke sambila Mwana-dimeme, na Zulu mpe na ntoto; Buku ya kukangama na bidimbu sambwadi, Mwana-dimeme ya kulunga, Tata Musumbi. Mpe kubanda na nzila ya 8, tii na nzila ya 14, Bawanzio ke fukimina Yandi, bakuluntu ke fukimina Yandi, Bivangu yina kele ya moyo ke fukimina Yandi. Mpe Jean fukimilaka Yandi mingi tii kuna yandi tubaka, “Bivangu nionso na Zulu, na ntoto, na nsi ya ntoto, kuwaka munu kutuba, ‘Masakumunu, nkembo, ngolo, ndwenga, kuvwanda ya Mwana-dimeme.’” Ntangu ya kufukimina Ntinu Mwana-dimeme. Ntangu yayi, Dibundu me kwenda, beno bambuka moyo.

⁶⁵ Ntangu yayi beto baka Daniel, mpe kapu 9, mpe nzila ya 1 tii na nzila ya 3. Na manima beto ke baka nzila ya 20 tii na nzila ya 27, samu yayi ke kisambu ya Daniel. Mu zola ti beno tanga yayi mingi mpe beno tanga yawu diaka, na kati ya sabala, ntangu yayi, tii na beno ke simba yawu.

Na mvula ya ntete ya Darius mwana ya . . . dikanda ya Medes, yina kumaka mfumu na zulu ya ba-Chaldéen;

Na mvula ya ntete ya luyalu munu Daniel . . . telemaka, bakulaka na nzila ya babuku ti ntalu ya . . . bambvula, landila ndinga ya Nzambi yina kwisaka na

profete Jérémie, ti ya ke vwanda na bamvula makumi sambwadi na kubeba ya Jérusalem.

Ntangu yayi (nzila ya kulanda) mu balulaka kizizi ya munu na Mfumu Nzambi, samu na kusosa na bisambu mpe kubondila, na kumanga madia, na saki, mpe mbombi:

. . . Mu sambilaka MFUMU . . . Nzambi, mpe fungunaka masumu ya munu, . . .

⁶⁶ Mpe ya ke landila mutindu yina, tii kuna beto ke kuma na nzila ya 20. Samu na kunwanina ntangu, bantu ke ya kutelama, mu ke zola ti beno kwenda tii na nzila ya 20, samu beto kuma ntangu yayi na—na nzila ya 20.

Mpe na ntangu mu vwandaka zonza, mpe mu vwandaka sambila, mpe vwandaka funguna masumu ya munu mpe masumu ya bantu ya munu ya Israel, mpe vwandaka bondila MFUMU Nzambi ya munu samu na mongo ya santu ya Nzambi ya munu;

Ntete, na ntangu mu vwandaka zonza na kati ya kisambu, Gabriel muntu yango, yina mu monaka na vision na mbandukulu, bandaka . . . pumbukaka na nswalu nionso, pene-pene ya munu na ntangu ya dikabu ya nkokila.

Mpe yandi zabisaka munu, mpe tubaka na munu, mpe tubaka, O Daniel, Mu me kwisa ntangu yayi samu na kupesa nge mayele samu nge bakula.

⁶⁷ Kana beto zolaka vwanda kuna! Wapi mutindu Yandi monaka yandi? Na kisambu.

Wanzio, “muntu.” Beno tala, yandi bokilaka Yandi, “muntu.” Mpe na kuvwandaka ya . . .

Mpe mbandukulu ya kubondila ya munu ndinga mosi basikaka, (mpe ndinga basikaka samu yandi kukwenda), mpe mu kwisa samu na kutalisa na nge; samu nge ke nkundi ya luzolo: kana . . . na yina simba ndinga, mpe bakula vision.

Ba me zenga basabala makumi sambwadi samu na bantu ya nge mpe samu na mbanza ya nge ya santu, to mbanza ya nge, samu na kusukisa kukolama, . . . samu na kusukisa disumu, mpe kusungika disumu ya nkú, mpe samu na kunata kieleka ya mvula na mvula, mpe samu na kutula kidimbu na vision mpe profesi, mpe samu na kupakula kisika ya kulutula Santu.

Ya ke na bikuma sambanu ya nkwizulu ya Yandi. Ntangu yayi beno tala.

Ntangu yayi, na yina, zaba mpe bakula, (beno kuwa ntangu yayi) ti kubanda kubasika ya ndinga samu na

kuvutula mpe kutunga diaka Jérusalem samu . . . Mesiya Ntinu ya ke vwanda na basabala sambwadi, . . . basabala makumi sambanu na zole: mpe banzila ke tungama diaka, mpe bibaka, kasi na ntangu ya mpasi.

. . . na manima ya basabala makumi sambanu na zole ba ke katula Mesiya, kasi muntu mosi ve ke vwanda samu na yandi: mpe bantu ya ntinu yina ke kwisa—ntinu yina ke kwisa . . . ke bebisa mbanza na yinzo ya bisambu; mpe nsuka ya yandi ke kwisa mutindu kufulukuka ya masa, . . . samu bakiadi ke vwanda tii na nsuka ya mwita.

Mpe yandi ke sala ngwisani ya ngolo (beno kuwa) na bantu mingi na sabala mosi, mosi ya basabala makumi sambwadi: mpe na kati-kati ya sabala yandi ke sukisa munkayulu na . . . makabu, mpe mubebisi ke sala busafu ya kulutula ti yandi ke kumisa yawu kiadi, ata mpe samu na kubeba, mpe yina ba yidikaka samu na mubebisi.

⁶⁸ Ntangu yayi, yayi ke vwanda dilongi ya beto na lukutakanu tatu, yiya, tanu ke kwisa, nionso yina Mfumu ke talisa. “Basabala makumi sambwadi.”

⁶⁹ Ntangu yayi, mu ke yufula Doc, kana yandi zola, kutudila munu tableau, na nkokila yayi, samu mu vwanda na kiyeka ya kusonika yawu. Mu ke zola ve ti beno kondwa yawu. Ntangu yayi beno fwana kulongoka na munu, mpe kulongoka na mudindu, kana ve beno ke kondwa yawu. Mpe mu ke zola kuyema yawu awa na tableau, na yina beno nata bakilapi ya beno na papié mpe beno sonika bilumbu yayi, bantangu yayi, mpe nionso samu na yawu.

⁷⁰ Ntangu yayi, basabala makumi sambwadi ke banda (ntangu yayi beno simba yayi mbote) na manima Dibuundu me kwenda. Ntangu yayi, muntu nionso me bakula yawu, beno tuba, “Amen.” [Dibuundu me tuba, “Amen.”—Mu.] Ntangu yayi, na manima Dibuundu me kwenda.

⁷¹ Apocalypse 6:1, tii na Apocalypse 19:21, me kangama na basabala makumi sambwadi, na yina beto fwana telema mpe kutendula yawu, na ntwala beto kwenda na ntwala. Beto fwana telema mpe kutendula samu na yinki basabala makumi sambwadi yayi. Samu, kana ve, beno ke kondwa Bidimbu yina, beno ke kondwa Bampungu yina, beno ke kondwa Bambungu yina, beno ke kondwa Bampasi yina, bampeve tatu yina ya mvindu mutindu bakiula, Bakiadi yina, kulosama ya dalango ya mbwaki, kento na kati ya mwini. Beno ke kondwa yawu nionso, kana ve, samu ya ke salama awa na sabala makumi sambwadi yayi. Ya ke kisika yina ya ke salama.

⁷² Ntangu yayi, profete Daniel salaka bamvula makumi sambanu na nana na Babylone. Samu na beno ke zola baka ba-référence, mpe kana beno zola kusadila ntangu, yina mu me

baka na ku—kusosa yawu. Bamvula makumi sambanu na nana! Yandi kwendaka na kimpika na mvula 606 na Ntwala ya Klisto, mpe ntangu vision kwisaka na yandi ya vwandaka—vwandaka na mvula 538 na Ntwala ya Klisto. 606 katula 538, ya ke pesa makumi sambanu na nana. Bamvula makumi sambanu na nana yandi vwandaka na Babylone, na kati ya mimpani, mpe yandi vwandaka kaka na lunungu. Amen. Beto lenda sala ngunga mosi ve.

⁷³ Kasi yandi vwandaka na kati-kati ya kieleka, kukondwa muntu mosi kasi bankundi tatu, mpe bawu vwandaka na bizunga yankaka ya kimfumu. Kasi, Daniel, telamaka yandi mosi na Nzambi, yandi vwandaka na lunungu bamvula makumi sambanu na nana. Beno banza na yawu! Mu ke zola kubanda kulonga ve, samu yayi lendaka vwanda dilongi ya Nsangu. Kasi, bamvula makumi sambanu na nana, yandi vwandaka kaka na lunungu mpe yandi vwandaka kukondwa mvindu na ntwala ya Nzambi; kukondwa mbotika ya Mpeve-Santu, kukondwa Menga ya Yesu Klisto samu na kulombila yandi; kaka na menga ya bangombe, mpe ya bankombo, mpe bana ya bangombe, yina ya vwandaka kupesa na kinsweki, samu na binkulu ya mimpani ya yinsi yina. Ba nataka bawu kuna. Jérémie pesaka profesi samu na bawu, ti ba ke kwenda kuna.

⁷⁴ Ntangu yayi, Daniel, oh, la la, yandi bandaka na kumona ti ntangu me kuma pene-pene, kaka mutindu beto kele bubu yayi. Daniel bandaka na “kubakula,” yandi tubaka, “na nzila ya kutanga babuku.”

Mpe na mvula ya ntete ya luyalu ya... Daniele... na luyalu munu Daniel kubakulaka na nzila ya babuku natalu ya... bamvula, na yina... ndinga ya MFUMU kwisaka na profete Jérémie, ti ya ke luta bamvula makumi sambwadi na... kiadi ya Jérusalem.

⁷⁵ Jérémie, na mvula 606 na Ntwala ya Klisto, pesaka profesi, samu na masumu ya bawu mpe kukondwa busantu ya bawu, ti ba ke vwanda kuna bamvula makumi sambwadi.

⁷⁶ Beno bambuka moyo, ya vwandaka na profete yankaka kwisaka na kilumbu yina. Mu lenda bokila nkumbu ya yandi ve na ntangu yayi. Mu lenda tubila beno yawu na—na mwa minuti fioti, kana mu lendaka sosa fioti. Kasi yandi kwisaka mpe tubaka, “Jérémie, nge ke na kifu. Nzambi ke bika Israel kuna kaka bilumbu mingi, samu na bilumbu mingi, na kutala bilumbu zole.”

⁷⁷ Jérémie tubaka, “Ya vwanda mutindu yina. Amen.” Yandi tubaka, “Kasi vingila fioti. Bika nge na munu kutala yawu kintwadi mosi na yankaka, mutindu baprofete.” Yandi tubaka, “Bambuka moyo, ya ke na bayina kupesaka profesi na ntwala ya beto, mpe ba tubaka mambu yina vwandaka ya luvunu. Mpe bawu kuzwaka makambu na Nzambi samu na ba tubaka mambu

ya luvunu. Na yina, beno bika mu vwanda kieleka. Kasi Mfumu Nzambi tubaka na munu ti ya me bikala bamvula makumi sambwadi.”

Nzambi bulaka profete yina ya luvunu, mpe bakaka luzingu ya yandi kaka na mvulu yina, samu Nzambi tubaka na profete yayi ya kieleka ti ya vwandaka na bamvula makumi sambwadi.

⁷⁸ Mpe mu zola ti beno bakula mutindu Daniel, ata ti ya vwandaka nzenza, ata ti yandi vwandaka ntama ya bantu ya yandi, ntama ya dibuundu ya yandi, ya vwandaka ve na balukutanu, ya vwandaka na dibuundu ya kukwenda ve, ya vwandaka na bankunga ya kuyimbila ve kasi yina ya vwandaka yimbila yandi mosi, na kati ya mambu nionso yayi, yandi bikalaka ya kwikama na yina profete yina tubaka. Amen! Amen!

⁷⁹ Dibuundu ya kukwenda ve, muntu ve vwandaka na kimpangi na yandi; bantu nionso vwandaka kwenda na batempelo ya mimpani, bantu nionso vwandaka fukimina biteki. Bankunga ya Buklisto vwandaka ve; muntu mosi ve vwandaka kwikila mutindu yandi. Mpe na bamvula makumi sambanu na nana, kubanda ya vwandaka bakala ya ntwenia pene ya bamvula kumi na mosi, ya vwandaka na bamvula kumi na yiya, ntangu ba nataka yandi kuna, yandi bikalaka ya kwikama na Nzambi; mpe yandi bakulaka na nzila ya profete Jérémie ti bilumbu vwandaka kaka me luta.

Wapi mutindu yina lendaka benda bukebi ya profete nionso ya kieleka ya Nzambi bubu yayi, ntangu beto ke tala na ntangu me luta mpe beto ke mona yina profete yayi ya kieleka kutuba, mpe kuzaba ti beto me kuma na ntangu ya nsuka.

⁸⁰ Yandi tubaka, “Mu me bakula na nzila ya babuku ti Jérémie, mpangi ya munu ya bakala, bamvula mingi, mingi me luta, pesaka profesi ti Israel ke vwanda awa bamvula makumi sambwadi. Mpe na kutala ntangu yango me lunga.” Mpe yandi mosi me kubama. Mpe yandi mangaka madia, mpe yandi kukisantisaka, mpe ntangu . . . mbombi na saki, mpe yandi tulaka yawu na zulu ya yintu ya yandi, mpe yandi mangaka madia mpe vwandaka sambila, samu na kubakula yinki kilumbu ba vwandaka kuzinga.

⁸¹ Mpe kana Daniel, profete ya Mfumu, lendaka tanga babuku ya Jérémie, mpe ya nata yandi na kisika yayi; ti ata mpe kubasika ya Israel, ti bayina nionso vwandaka ya moyo, lendaka kubasika na Babybone, samu na kukwenda na yinsi ya bawu, lendaka nata yandi na kumanga madia mpe kubaka saki na mbombi. Wapi mutindu diaka ya lendaka nata Dibuundu ya Nzambi ya moyo, na kuzaba ti ntangu ke na kumana mpe ya ke vwanda diaka ve; mpe Nkwizulu ya Mfumu Yesu Klisto, mpe Millenium ya nene me kuma pene-pene! Wapi mutindu beto lendaka lutisa ntangu ya beto, na kubulaka nsaka ya mbongo, na kukwendaka

na piscine na Lumingu, ntangu kele ve samu na Mfumu? Beto ke dumuka fioti kuna. . . Kana pasteur kutuba kima yina ke sepelisa beno ve, beno ke telama mpe beno ke kwenda. Mpe kana—kana lukutakanu kubaka ntangu mingi, na yina, beno—beno, beno ke—beno ke sepela ve. Beno tala mutindu beto kele. Beno tala yina beto ke na kusalaka.

Beno fwanikisa baluzingu ya beto na yina ya profete. Muntu mosi, na kimfumu ya muvimba, kukondwa dibuundu ya kukwenda, mpe kisika yankaka ya kukwenda ve. Ba bebisaka yawu nionso mpe zikisaka nionso na tiya; mbanza ya yandi, bantu ya yandi vwandaka na kimpika. Bamvula makumi sambanu na nana! Makumi sambanu na nana, makumi sambanu na yivwa, makumi sambwadi; yandi bikalaka na bamvula zole. Na yawu ntangu yandi bandaka na kutanga na buku mpe yandi monaka ti ntangu vwandaka me kuma pene-pene, na kulunga, yandi kwendaka na Nzambi na kisambu, samu na kuzaba yina ya vwandaka.

⁸² Yinki ntangu yayi! Yinki beto ke sala? Ntangu, “Bayinsi ke na kupanzana; nzadi ke na kudila; bantima ya bantu kele na boma; bawu zaba ve yinki kusala.” Bima yayi nionso, bisono na kibaka. Kupanzana kati ya bantu; mambu ya yimbi ya mutindu na mutindu ke na kusalama na yinza; mpe bakuswana, na bamvita, mpe mambu ya mpasi. Mpe minduki mingi ke na kudiembela na ba-hangar, na mutindu ti mwa yinsi mosi ya fioti na kitezo ya Cuba pene-pene awa lenda bebisa yinza na minuti kumi. Mpe ba ke swana mosi na yankaka, bantu ya kukondwa busantu yina zaba Nzambi ve mpe yina zaba ngolo ya Yandi ve.

Mpe Mpeve-Santu ke na kati ya Dibundu, ke na kusala na kati bayina Soolamaka, samu na kutalisa Yandi mosi ti ya ke ya moyo na manima ya bamvula mafunda zole, ti Yandi ke mutindu mosi mazono, bubu yayi, mpe kukonda nsuka. Wapi mutindu beto lenda vwanda kuna na bumolo nionso? Wapi mutindu beto lenda baka diambu na nsongi? Ntangu me lunga beto kukitala, na kumonaka ngunga yina ya nene ke na kukwisa.

⁸³ Ntangu yayi, yandi tangaka na Jérémie, kapu 25. Beto baka Jérémie kapu 25, mpe beto tanga yina Jérémie tubaka. Ntangu yayi, beto banda na nzila ya 8, samu ya ke. . . mu zola ti beno simba yawu mbote. Nzila ya 11 kele kisika mu sonikaka awa samu na kutanga, kasi beto banda na nzila ya 8.

Na yina mutindu me tuba MFUMU ya bampeve; . . .

Mu ke zolaka yawu. Ntangu mu lenda kuwa profete mosi me telama kuna na MUTINDU ME TUBA MFUMU, mpangi, yimeni. Samu na munu, ya me sukisa diambu. Kima ya kuyika diaka kele ve.

. . . mutindu me tuba MFUMU ya bampeve; Samu beno me kuwa ve bandinga ya munu,

Tala, Mu ke kwenda kusosa bantu ya nord, tubaka MFUMU, mpe Nebucadnetsar ntinu ya Babylone, kisadi ya munu, mpe mu ke nata bawu diaka. . . samu na kunwanisa yinsi yayi, mpe samu na kunwanisa bantu ya yawu, mpe samu na kunwanisa bayinsi nionso ke na nziunga ya yawu, mpe Mu ke bebisa bawu kimakulu, . . .

Beno bambuka moyo, ba vwandaka bantu yina soolamaka na Nzambi yina Yandi vwandaka tubila. Yina vwandaka mimpani ve. Yina vwandaka bandimi ya dibuundu.

Mu ke sukisa na kati ya bawu biololo ya kiese, . . . biololo ya nsayi, (kaka mutindu beto ke na yawu bubu yayi, ba rock-and-roll nionso yayi, mpe Ricky na Elvis,) mpe, oh, biololo ya kento ya makwela, . . . biololo ya ndeke. . . to, biololo ya kento ya makwela, mu zola tuba, muningu ya kunika bambuma, . . . nsemo ya mwinda.

Mpe yinsi yayi ya muvimba ke vwanda na kiadi, . . .

Beno kuwa profete yina kuboka, “Yinsi yayi ya muvimba ke bebisama!” Mpe ya ke samu na kumekula ve kisadi yayi ya nene ya Nzambi, kasi mu ke pesa profesi ti yinsi yayi ya muvimba ke bebisama. Nzambi ke pesa kitumbu na yinsi yayi samu na masumu ya yandi. Kana Nzambi lendaka bika ve Israel, muponami ya Yandi, Nkuna ya Abraham, yina Yandi salaka ngwisani mpe nsilulu na yandi, kana Yandi lendaka bika bawu ve swi na mambu ya yimbi; ata ti ba vwandaka basambidi tii na mikwa, na bayinzo-Nzambi ya nene, mpe banganga-Nzambi, mpe ba-rabbin; kasi samu na kukondwa bumuntu mpe mambu yina vwandaka na kati ya bawu, mpe Nzambi salaka ti bawu kubuka yina ba kunaka, ya ke vwanda mutindu mosi samu na beto. Nzila ya 11:

. . . yinsi yayi ya muvimba ke bebisama, mpe . . . kuyituka; . . .

Ya zola tuba, bantu nionso ke tala kaka mpe ke tuba, “Bawu yina. Ba vwandaka na ngolo mingi. Beno tala bawu ntangu yayi.”

. . . mpe bayinsi yayi ke sadila ntinu ya Babylone bamvula makumi sambwadi.

Yayi ke luzingu ya muvimba. Ya ke ntangu mama ya beno ya kiboba, ya kusakumuka vwandaka bébé. Ba vwandaka kuna kukondwa Nzambi, kukondwa dibuundu, kukondwa nkunga, kukondwa kima mosi ve, nsungi ya muvimba, kuna nsungi ya bantu nionso yina ya masumu kufwaka.

Mpe ya ke salama ti, ntangu bamvula makumi sambwadi ke lunga, yina Mu ke pesa kitumbu na ntinu ya Babylone, mpe yinsi yina, mutindu me tuba MFUMU, samu na masumu ya bawu ya nkú, mpe yinsi ya ba-Chaldéen, mpe mu ke sala yawu kubeba ya seko.

Mpe mu ke nata na zulu ya yinsi yayi mambu yina nionso mu zabisaka samu na yandi, ata mpe yina me sonama na kati ya bubu yayi, yina Jérémie tubaka na profesi na zulu ya yinsi ya muvimba.

Na yina bayinsi ya ngolo mpe bantinu ya nene ke sala bawu—bawu bampika diaka: mpe Mu ke futa . . . landila bisalu ya bawu, mpe landila bandinga ya bawu ya maboko ya bawu.

Samu mutindu me tuba MFUMU Nzambi ya Israel na munu; Baka na diboko ya munu mbungu yayi ya kufulukuka na makasi ya munu, mpe pesa yawu na bayinsi nionso, sika wapi Mu ke tinda nge, samu bawu kunwa yawu.

Na nzonzolo yankaka, “Jérémie, mu me pesa nge nsangu yayi. Kuvwanda kuna ve kukondwa kusala kima mosi. Kuvwanda kisika mosi ve, kasi pesa profesi na bayinsi nionso.” Beno me kuwa yawu? “Pesa profesi na yinsi ya muvimba. Talisa bidimbu ya Munu mpe bimangu, mpe sala ti bawu kuzaba ti Mu ke kwisa samu na yayi.”

Mpe ba ke kunwa, mpe ba ke tinguna, mpe ba ke vwanda mutindu bilawu, samu na ndinga yina Mu ke tinda na kati ya bawu.

⁸⁴ Yinki ba ke na kusala na kilumbu yayi? Ba ke bokila nge profete ya luvunu, ba ke bokila nge muntu yina ke kakulaka, ba ke bokila nge fanatiki, muntu ya lumoni, to muntu ya bandosi, to muntu yina ke tangaka mabanza ya bantu. “Ba ke vwanda bilawu!” Mpe mpova yayi *kilawu*, kana beno zengumuna yawu, ya zola kutuba “yina me bela kilawu.” “Kieleka ba ke bela kilawu, mpe ba ke tuba, ‘Ah, beno kipe ve exalté yina, yina ke buzoba,’ samu na Ndinga yina Mu ke fidisa na kati ya bawu.”

⁸⁵ Beno me mona masolo ke vutukisa yawu mosi? Jérémie wisanaka ve na ba-Pharisien ya bawu, na ba-Sadducéen ya bawu, na ba-Hérodien ya bawu, nionso yina ba lendaka vwanda. Yandi, yandi longaka kaka Ndinga, mpe Yina salaka ti bawu nionso kubaka makasi samu na yandi. Yinki? Beno tala ntangu yayi.

Mpe na manima mu bakaka mbungu na diboko ya MFUMU, mpe salaka ti bayinsi nionso kunwa yawu, . . .

Jérémie bikalaka na yinzo ve. Jérémie kubikalaka ve na mwa bwala mosi ya fioti, kasi yandi salaka ti bayinsi nionso kunwa yawu.

. . . na bayina MFUMU me tinda munu:

⁸⁶ Jérémie bakaka Ndinga ya Mfumu, vinu ya Ndinga ya Yandi. Mpe vinu kele ngolo ya Ndinga ya Yandi. Vinu ke vwandaka na ngolo. Vinu kele kima yina ke lawusaka. Vinu ke vwandaka na ngolo. “Mpe mu bakaka Ndinga ya Mfumu,” tubaka Jérémie,

“mpe yandi talisaka Yawu. Vinu, ngolo yina ke vwandaka na kati ya Yawu, mu me talisa yawu na ntwala ya bawu, mpe ba zolaka kuwa Yawu ve.”

Nzambi tubaka, “Na yina Mu ke tinda bawu na Babybone bamvula makumi sambwadi.” Yawu yina kaka Yandi salaka. Muntu ya mbote na muntu ya yimbi kwendaka, bawu nionso kukwendaka.

⁸⁷ Ntangu yayi, beto vutuka na dilongi ya beto. Daniel kutangaka. Beno banza kaka, Daniel kutangaka Bandinga ya mutindu mosi beto ke na kutanga na suka yayi. Daniel kutangaka Biblia ya mutindu mosi, punctuation ya mutindu mosi, ba-phrase ya mutindu mosi, bima ya mutindu mosi yina munu, na lusalusu ya Nzambi, ke tangila beno na mwa Bansangu ke kwisa na ntwala, kima mosi, samu na kotalisa beno ti beto me kuma na nsuka ya ntangu.

Mpe Daniel, bakaka Ndinga ya Jérémie, yandi kwendaka na Babybone. Mpe yandi vwandaka profete yina me pakulama. Mpe yandi salaka bimangu, bidimbu, yandi lendaka tendula bandinga yina ba me zaba ve, mpe yandi salaka bidimbu mpe mambu ya ngitukulu na kati ya bawu. Kasi, ya vwandaka na muntu ve, ya vwandaka yandi mosi! Amen! Yandi vwandaka yandi mosi.

⁸⁸ Kasi Jérémie sonikaka Bandinga yayi bamvula mingi, mingi na ntwala. Mpe Daniel, vwandaka tendula Ndinga, yandi bakulaka . . . “Tala, beno vingila fioti. Beto me kuma na ntangu ya nsuka, samu mu me vwanda ntete awa bamvula makumi sambanu na nana. Mpe profete ya Mfumu,” amen, “mpangi ya munu ya bakala, profete ya kieleka ya Nzambi yina siamisamaka yandi mosi profete, pesaka beto profesi. Mu kele na yawu ya kusonika awa na kati ya buku, yina tubaka, ‘Bamvula makumi sambwadi ke luta.’ O Mfumu Nzambi, beto me kuma na nsuka. Nkonga ya bantu yina nionso me kufwa. Yinki Nge ke sala ntangu yayi, Mfumu? Nge silaka na kutinda beto . . .” Mpe yandi bakaka yandi mosi lukanu, ya kusambila.

⁸⁹ O Nzambi, kana ya me vwandaka ntete ve na ntangu yina beto lendaka baka lukanu, ya kusambila, ya ke ntangu yayi. Samu, beto mutindu kisadi ya Yandi ya kieleka, beno me mona, na nzila ya Mikanda ya bantumwa, na nzila ya Mpeve-Santu ke na kukebisaka beto, ti beto me kuma na kilumbu ya nsuka. Mpeve-Santu ke na kutuba, “Ti na bilumbu ya nsuka, bantu ke sala matalana, bantu ke vwanda na lunangu, bawu ke zola mikembo kasi Nzambi ve, bawu ke zitisa ve bima ya santu, ba ke zonga mambu ya yimbi na nzutu ya bampangi, bawu ke lenda ve na kukutika banzutu ya bawu, bawu ke vwanda bambeni ya mambu ya mbote.” Mu me bakula na nzila ya Mukanda.

⁹⁰ Mpe mu me bakula ti ya ke vwanda na baseki, na kilumbu ya nsuka. Mu me bakula ti ya ke vwanda na yinsi ke nwanisa

yinsi yankaka, na kilumbu ya nsuka. Mu me bakula ti ya ke vwanda na kutomboka ya nzadi, na kilumbu ya nsuka. Mu me bakula ti ya ke vwanda na bima yina ke pesa boma na kutala, mutindu ba-soucoupe volante, na zulu, bima ya ngitukulu, mpe bantima ya bantu ke vwanda na boma. Ya ke vwanda na ntangu mosi ya mubulu, mpe kiadi na kati ya bantu. Mu me tanga ti bawu nionso ke kota na ba-organisation mpe ba-denomination, mpe ba ke vwanda na kimvuka ya mabuundu, na kilumbu ya nsuka. Mu me bakula ti bakento ke zengisa bansuki ya bawu na kilumbu ya nsuka. Mu me bakula ti ba ke lwata bilele ya nkufi, mpe ba ke tambula na ba-talon ya yinda, yina ke tula makelele na ntangu ba ke tambula, na kilumbu ya nsuka. Mu me bakula ti bumuntu ke vwanda na nsi mingi na kilumbu ya nsuka. Mu me bakula ti milongi ke vwanda bamvungi ya luvunu na kilumbu ya nsuka, yina ke kakula, mpe bayina ke kudisa ve bantu na Ndinga ya Nzambi, kasi ba ke landa ba-credo mpe bima ya mutindu na mutindu, na kisika ya yawu. Kasi mu me bakula ti Ndinga mosi ke kuwakana na bilumbu ya nsuka, ya ke na ntoto ya kuyuma, ya ke bokila bantu na kuvutuka na Nsangu ya kisina, na kuvutuka na bima ya Nzambi. Mu me bakula, na nzila ya Buku, bima yina ke salama.

⁹¹ Mu me bakula ti na bilumbu ya nsuka ya ke vwanda na nzala. Mabuundu ke vwanda mingi na organisation, mpe ya kukangama mingi mpe nionso yina, ti ya ke vwanda na nzala na bilumbu ya nsuka, mpe ya ke vwanda kaka samu na dimpa na masa ve, kasi samu na kuwa Ndinga ya Nzambi ya kieleka. Mpe bantu ke kwenda na este, na weste, na nord, mpe na sud, samu na kusosa na kuwa Ndinga ya Nzambi ya kieleka. Kasi mabuundu ke mingi na organisation mpe ya kukangama, ti ba ke kuwa Yawu ve. Mu me bakula yawu na nzila ya ba-Buku. Kasi, na kilumbu yina, O Nzambi, Dikanda mosi ke basika na David.

⁹² Mu me bakula ti Yandi ke fidisa Elie na ntwala kilumbu yina kukwisa na ntangu ya nsuka, mpe yandi ke vwanda na Nsangu yina ke vutula bantima ya bana na batata, ya ke vutula bawu na kisina, ba ke vutuka diaka na nsuka, mpe kubanda diaka. Mu me bakula ti ya ke salama na ntwala Mpeve kubika dibuundu ya Bantu ya makanda, samu na kuvutuka na ba-Juif.

⁹³ Mpe mu me bakula kaka na nzila ya Mukanda ve. Mu me bakula na nzila ya Ndinga, na nzila ya Ndinga yina me sonama, ti Israel ke vutuka na ntoto ya bawu; mpe mu me mona yandi ke vutuka.

⁹⁴ Mu me bakula na nzila ya Mikanda ya ba-profete, ti Israel ke kuma yinsi mosi. Ba ke vutula bisambu na tempelo. Nzambi ke sala diaka na yandi ntangu ya ke vutuka na yinsi ya yandi. Oh! Ba-profete zole ke basika na bilumbu ya nsuka, na kati ya bawu. Mu me bakula yawu. Kaka ntangu Dibundu ya Bantu ya makanda ke kwenda, ba-profete zole ke kuma, Elie na Moise, na Israel. Beto ke tubila yawu na dilongi ya beto.

95 Profete monaka ti ntangu vwandaka me kuma na nsuka kuna na Babylone. Mbote mingi.

96 Gabriel monanaka, samu kaka na kutalisa ve yina yandi vwandaka kulomba, kasi samu na kuzabisa yandi nionso yina ba yidikaka samu na dikanda ya ba-Juif, landila kaka tii na nsuka. Amen! Yandi lombaka kima ya fioti, mpe yandi kuzwaka nionso. Yandi lombaka kaka samu na kuzaba . . .

97 Daniel vwandaka meka na kumona, “Bantangu yikwa, Mfumu, ya me bikala diaka ntangu yayi? Jérémie profete, kisadi ya Nge, mpangi ya munu ya bakala pesaka profesi bamvula makumi sambanu me luta, mpe yandi tubaka, ‘bantu yayi ke vwanda awa bamvula makumi sambwadi.’ Nsungi ya bantu nionso ya ntama na kutala me kufwa.”

98 Ya ke na nsungi ya bantu ya Pentecote yina me telema, bamvula makumi yiya me luta. “Minwani mvita ya ntama,” ba vwandaka bokila bawu. Ba salaka organisation, ba nwanaka, mpe bawu swanaka, kuna na Mongo Horeb mpe Nebo, na nzila nionso. Kasi, na nsuka, beto me kuma na nzadi ntangu yayi. Yandi ke basisa yina ya malu-malu, na Josué samu na kuzabusa bawu. Musiku kubwaka; Moise kwendaka na yawu; Moise kubwaka. Josué kuzabusaka bawu. Beto ke mona ti ba-organisation kubwaka, kasi Mpeve ya Nzambi . . . Josué, mpova yayi *Josué*, zola kutuba “Yesu Mvulusi ya beto.” Ti, Mpeve-Santu ke kwisa na Dibuundu. Ya ke organisation ve, kasi Mpeve-Santu ke vwanda na kati ya bantu mpe ke kukubika Yandi samu na kumata, samu na kuzabuka Jourdain. Mu me bakula na nzila ya kutanga Buku ti yawu yina ke salama. Mpe Nzambi kuzaba ti yawu yina mu ke sosa na ntangu yayi, ti mu ke na kupesa kikesa na bantu ya Yandi mpe mu ke tuba na bawu yina zola kusalama, kutuba na bayina kele awa na suka yayi, mpe kuna na bayinsi yina ba-bande yayi ke kwenda, na yinza ya muvimba, ti beto me kuma na ntangu ya nsuka.

99 Yandi talisaka nionso tii na ntangu Kimfumu ke vutuka ya muvimba tii na Millenium. Yawu yina vwandaka nsangu ya Gabriel. Yandi tubaka, “Mu me kwisa samu na kutuba na nge ti ya ke na bamvula makumi sambwadi, basabala makumi sambwadi, diaka, yina ba me zenga samu na bantu ya nge, ba me zenga samu na nsuka ya nsungi ya ba-Juif. Ya ke na basabala makumi sambwadi.” Ntangu yayi beno tala yina Yandi tubaka. Ti kuna, kubanda ntangu ba zabisaka kuvutuka . . .

Makumi sambwadi ya basabala ba me zenga samu na bantu ya nge mpe samu na . . . mbanza ya nge, . . .

“Mbanza ya nge.” Babylone vwandaka mbanza ya yandi ve. Yina . . . Wapi vwandaka mbanza ya yandi? Jérusalem.

100 Ntangu yayi, ntangu beto ke kuma na sambwadi, to bansiamisa sambanu, beto ke mona yina mbanza yina kele, mpe kutula yawu mpe kutalisa nani ya vwandaka, nani kubandaka

yawu, wapi ya me katuka. Bantangu yikwa ya ke vwanda ya kutelema? Ba ke tunga yawu diaka? Yinki ntangu? Oh, bima ya nene ke vingila beto. Mbote mingi.

Makumi sambwadi ya basabala ba me zenga samu na bantu ya nge mpe samu na . . . mbanza ya nge, samu na kumanisa yimbi, . . .

Ntangu yayi, Yandi tubaka ata fioti ve, “Daniel. . .” Na ntembe ve ti ya zolaka kutuba na Yandi ti basabala makumi sambwadi vwandaka. . . Mu zola tuba, bamvula makumi sambwadi vwandaka me kuma na nsuka. Makumi sambanu na nana, ya vwandaka kondwa kaka bamvula zole. Mpe beto ke mona ti profesu ya Jérémie vwandaka nionso ya kieleka. Bamvula zole na ntwala, bawu basikaka. Néhémie kwendaka mpe yandi bakaka muswa na ntinu, mpe yandi tungaka kibaka na bantangu ya mpasi. Bawu salaka. Yandi tubaka, “Kibaka. . .” Beno kuwa yayi.

. . . samu na kumanisa yimbi, . . . samu na kusukisa disumu, . . .

“Samu na kusukisa disumu.” Ya nani? Ba-Juif. “Ba me zenga samu na bantu ya nge,” samu na Bantu ya makanda ve. “Samu na bantu ya nge,” ba-Juif. “Mpe mbanza ya nge,” New York ve, Boston ve, Philadelphie ve, Chicago ve, Los Angeles ve, Rome ve. Kasi, “Samu na mbanza ya nge,” Jérusalem.

. . . mpe samu na kumanisa yimbi, . . . samu na kusukisa disumu, . . . samu na kuvutula ngwisani na disumu ya nkú, mpe samu na kunata kieleka ya seko, mpe samu na kutula kidimbu na vision mpe na profesu, mpe samu na kupakula kisika kulutula ya Santu. (Beno tala!)

Na yina zaba mpe bakula, ti kubanda kubasika ya ndinga samu na kuvutula mpe kutunga diaka Jérusalem (yina vwandaka mbanza ya yandi) tii na. . . Mesiya Ntinu ya ke vwanda na basabala sambwadi (ya makumi sambwadi), . . .

¹⁰¹ Beno vingila kaka beto kuma kuna! Oh, la la! Ya ke lusakumunu ti mu. . . Ya ke lomba ti mu baka nsinga mpe mu kukikanga munu mosi awa.

¹⁰² Yandi talisaka nionso tii na nsuka, ya tubaka, “Mu ke tuba na nge kaka ve ti bamvula zole yina me kuma pene-pene, ya ke mana, ya me lungisama.” Mpe beto nionso kuzaba kikuma ba vwandaka kuna bamvula makumi sambwadi, mpe—mpe bawu basikaka, kaka mutindu profete tubaka. Mpe Esaie, to mu zola tuba. . . Daniel kwikilaka profete yina, na yawu yandi vwandaka, ya kukubama. Mbote mingi. Mpe yandi. . .

103 Mpe ntangu yayi, ntangu Gabriel kwisaka, Yandi tubaka, “Mu me kwisa samu na kutalisa na nge nionso, kutalisa na nge mambu yayi, yina, tii na nsuka.” Beno me mona? Beno tala.

. . . busafu *yandi ke kwenda tii na nsuka, ata mpe tii na nsuka, . . .*

104 *Kilumbu ya nsuka* kele “nsuka ya bima nionso.” “Mu ke talisa na beno yina ke salama.” Beno kuwa ntangu yayi. Beno simba yawu! “Munu . . . Daniel, ba me fidisa munu. Nge ke nkundi ya luzolo na Zulu. Mpe mu me kuwa bisambu ya nge mpe mu me kulumuka ntangu yayi samu na kutuba na nge lukanu yina ba me baka samu na ba-Juif mpe Jérusalem, kubanda ntangu yayi tii na nsuka, ya bima nionso.”

105 Ntangu yayi, beno me bakula, dibuundu? Kana beto lenda mona yina basabala makumi sambwadi kele, beto ke zaba ntangu ke kubeba ke vwanda. Oh, la la! Nzambi sadisa beto na kuzaba yawu. Ya ke tuba na beto kieleka kisika mosi kuna na matiti yayi, kieleka kubanda ntangu yina tii na ntangu yayi, tii na nsuka, mpe ya ke kondwa ata na muniti mosi ve.

106 Wapi mutindu Ndinga ya Nzambi kele ya nene . . . Ntangu Nzambi salaka ntoto mpe tulaka yawu na orbite. Mpe mu vwandaka longi na nkokila yina, na Lumingi na nkokila, ya ke na kima mosi ke kubwa. Na yina, yinza yayi ke baluka mbote-mbote na mutindu ti ba lendaka tuba na beno kieleka ntangu mwini na ngonda ke kusungama, na bamvula makumi zole, kutuba na beno muniti ya ke salama. Monteke mosi ve na yinza, lendaka sadisa munu na kutuba na beno yawu; ata yina ya kulutula mbote beto ke na yawu, ya ke kwenda na ntwala na minuti zole to tatu na ngonda mosi, to ya ke vutukisa na manima na minuti zole to tatu. Beto lenda sala kima mosi ve yina ke vwanda ya kulunga. Samu, ya ke kaka na mosi yina kele ya kulunga, ya ke Nzambi. Mpe Nzambi na Ndinga ya Yandi ke mutindu mosi, na yawu Ndinga ya Nzambi kele ya kulunga.

107 Mpe kana beto lenda mona bilumbu yayi, beto ke mona kieleka ntangu kilumbu ya nsuka ke vwanda. Beno me bakula yawu? “Ba me zenga yawu tii na nsuka.” Nzila ya 24, “bantu ya nge na mbanza ya nge ya santu,” yina kele Jérusalem. Beno baka nzila ya 21 . . . Nzila ya 24 awa. Yesu fwanikisaka yayi na Matthieu 24.

108 Ntangu yayi, Mpangi Collins, kana yandi kele awa na suka yayi, mu zaba ve kana yandi kele awa to ve. Na bakiuvu ya nkokila yina, yandi yufulaka kiuvu mosi. (Mu banza ya ke vwanda mbote mingi samu mu tuba yawu, Mpangi Collins.) Samu na, “Muntu yina ba ke bokilaka kisafudi-kimwangisi,’ beno me mona, yina mu zola tuba?”

109 Yesu tubilaka yawu, na Matthieu kapu 24, mpe beto me mona yawu. Yinga, Matthieu 24:15. Ntangu yayi beno bika mu baka yawu na nswalu nionso, na yawu beno lenda mona ti, Yesu ke na

kutubila kima mosi awa, na kutangaka Daniel. Matthieu 24:15, samu na beno yina ke na kusunikaka. Mu zola ti beno, beno nionso ntangu yayi, mingi-mingi na nkokila yayi mpe—mpe na Lumingu ke kwisa, beno nata bilapi na bapapié, samu beto ke . . . kaka kana beno me baka bande. 24, mpe nzila ya 15, “Mpe yawu yina . . .”

Mpe ntangu beno ke mona muntu yina ba ke bokilaka kisafudi-kimwangisi, yina profete Daniel zonzilaka, . . .

Beno banza yawu! Yayi ke nkama yiya na makumi nana na tatu, -yiya, -tanu, bamvula makumi nana na sambanu na ntwala. Bamvula nkama yiya na makumi nana na sambanu na ntwala.

. . . profete Daniel, ya kutelama na kisika ya santu, . . .

Ntangu yayi beno tala na Biblia ya beno. Ya ke na kati ya lupangu.

. . . (muntu yina ke na kutanga mambu yayi fwana kubakula yawu mbote:)

¹¹⁰ Ntangu yayi, Yandi ke na kutuba na ba-Juif. Bawu zola kuzaba, “Yinki samu na tempelo yayi? Yinki ntangu ba ke bebisa yawu? Yinki ntangu ba ke tunga yawu diaka? Yinki ntangu ya ke vwanda na ntangu yina ya ke vwanda diaka ve ditadi na zulu yankaka? Bantangu yikwa me bikala?”

¹¹¹ Yandi tubaka, “Ntangu beno ke mona ‘muntu yina ba ke bokilaka kisafudi-kimwangisi, me telama ntangu . . .’ Daniel, ‘telamaka na kisika ya santu.’” Yandi tubaka, “Ntangu beno ke mona yayi ke salama, ntangu yayi bika ti muntu yina ke na kutanga mambu yayi fwana kubakula yawu mbote.”

Kikuma yawu yina beto ke na kusambila Nzambi, na kukumisa yawu ya kulunga mingi, ti ya ke vwanda ata na kivudi ya ntembe ve. Na yina, beto fwana kuyika ve ntendulu ya beto mosi na bima yayi. Ya fwana kwisa na nzila ya MUTINDU ME TUBA MFUMU. Na yawu, mu ke bika yawu kaka kuna tii kuna mu ke bakula.

Yandi talisaka na yandi bima yayi nionso, “busafu” yayi.

¹¹² Mpe, beno bambuka moyo, ya ke na bantendulu mingi, kaka mutindu, “Kubokila mwana ya munu ya bakala na kubasika na Egypte.” Mutindu ba bokilaka Israel na kubasika; mutindu ba bokilaka Yesu, Mwana ya Yandi, na kubasika.

Mpe ya ke salama kieleka mutindu yina, kaka mutindu mu me telama na ntwala ya beno awa. Mpe Yandi salaka yawu na mutindu mosi, mpe Yandi bumbaka yawu nionso, bumbaka yawu nionso na Dibuundu. Oh, ntangu beto ke longoka yawu, samu na kubakula bima yayi tatu, wapi mutindu Yandi me bumba nionso yayi na Dibuundu; na mutindu ti Dibuundu kuvwanda ntangu nionso ya kukubama konso muniti, samu ya me zaba ve yinki ntangu Yandi ke kwisa. Kasi ntangu yayi nsungi

Dibuundu me kuma na nsuka, nionso me kubama ntangu yayi samu na Nkwizulu, ya ke na kukubama.

¹¹³ Yayi ke Masonuku mosi ya kulutila mfunu na kati ya Buku. Yinki ya ke sala? Ya ke zabisa nsuka ya yinsi ya ba-Juif, ba-Juif. Masonuku yayi, basabala makumi sambwadi, ya ke talisa mpe ke tuba kieleka yina kele kubanda ntangu Daniel kubandaka kuna, tii na nsuka ya ntangu. Ya ke mosi ya bamontele ya kulutila nene. Bantu yikwa me kuwaka munu kutuba, “Kana beno zola kuzaba yinki kilumbu ya sabala ya kele, beno tala manaka. Kana beno zola kuzaba yinki ntangu beto ke na kuzinga, beno tala ba-Juif”? Ya kieleka. Ya ke manaka ya Nzambi, ya me baka yawu kuna. Théologien nionso, longoki nionso ya Biblia, muntu nionso, ke tuba na beno ti ya ke montele, ba-Juif.

Ntangu yayi yinki ntangu beto kele? Beto ke kaka . . . bantu, mwini kele ngolo, oh, mu . . .

¹¹⁴ Ya ke na kima kusala na Bantu ya makanda ve; Bidimbu Sambwadi yayi, Banpasi Sambwadi, Bakiadi Sambwadi, Bampungu Sambwadi, ya ke na kima kusala na yawu ve. Dibuundu ya Bantu ya makanda ke vwanda na Nkembo na ntangu yina. Ya ke na kima kusala na beto ve, Dibuundu ya Bantu ya makanda. Ya me tala kaka Israel. “Daniel, bantu ya nge na Jérusalem.”

¹¹⁵ Ntangu yayi, mpe ya ke talisa ti Nzambi ke salaka na ba-Juif na ntangu ba ke kaka na yinsi ya bawu. Alleluia! Mu banza ti kuna beto me simba kisika ya mfunu, kuna.

Ba ke mekaka kaka na kutanga kubanda ntangu yina Israel vwandaka kuna na ntangu ya Daniel. Mpe nsoniki mosi ya nene . . . Na yina, mu me zaba mwa bilandi ya yandi me vwanda awa, mu ke tuba yawu ve. Kasi ya kele samu na yina ba vwandaka na bima yayi nionso ya luvunu.

¹¹⁶ Beno me zaba wapi mutindu ba-Milleriste, na ntwala bawu kuma ba-Adventistes du Septième jour, yinki ba salaka kuna? Na 1919, ba bakaka mapapu ya bawu, (beno nionso me monaka yawu na zulunale Courier), mpe ba mataka kuna samu na kupumbuka, na suka yina. Yina babaka basabala makumi sambwadi ya Daniel. Uh-huh, ba-Milleriste. Na yina, na ntwala, na nzila ya Mama Ellen White, yina vwandaka profete ya bawu ya kento, bawu sobaka mabanza mpe ba bakaka nkumbu ya ba-Adventiste du Septième jour. Mpe ntangu yayi ba me soba nkumbu ya bawu na Ndinga ya Profesi. Beno me mona? Bankumbu tatu ya luswaswanu samu na nsambulu mosi.

¹¹⁷ Ntangu yayi, kasi ba vwandaka na kifu, samu ba vwandaka meka na kusadila basabala yina tatu na ba-Juif na Bantu ya makanda. Mpe Yandi me tuba awa, “Ya ke samu na bantu ya nge.” Mpe Nzambi ke salaka ata fioti ve na ba-Juif na nganda ya Palestine. Mpe ntangu Mesiya, na makumi sambwadi, mpe basabala zole, ba katulaka Yandi, (samu na Yandi mosi ve;

samu na beto, ba katulaka Yandi), Israel kupanzanaka, mpe kuvutukaka ve (ata fioti ve) na yinsi ya bawu tii na bamvula fioti me luta. Na yawu, ba tangaka ntangu kuna ve samu na nsungi ya Dibuundu. Beno me bakula yawu? [Dibuundu me tuba, "Amen."—Mu.]

Ya lendaka vwanda ve na 1919. Mu lenda talisa kima yina salamaka na 1919, kasi ya ke na ntangu yina Wanzio, nsangu ya Wanzio ya tatu kuwakana mpe Kiadi kubulaka. Ya kieleka. Kasi ya vwandaka ve. . . Ya vwandaka ntangu mvita kumanaka na mutindu mosi ya ngitukulu. Beto ke mona yawu na kapu 7 ntangu beto ke kuma kuna, ntangu beto ke kuna na kapu 7. Beno nionso me kuwaka munu kulonga yawu, na bantangu mingi, beno me mona, ntangu nsangu ya Wanzio tubaka, "Beno kanga bitembo nionso yiya na ntoto tii kuna beto ke tula kidimbu na ba-Juif bisadi." Mpe, ntangu yayi, ba me vingila tii kuna nsungi nionso ya Bantu ya makanda kuluta.

Na yina ntangu Yandi ke kwisa, na yina—na yina Yandi ke tula kidimbu na ba-Juif, nkama na makumi yiya na yiya ya mafunda kuzwa Mpeve-Santu. Ya ke na nkama na makumi yiya na yiya ya mafunda, yina ba me tula kidimbu. Apocalypse 7. Beno me tanga yawu.

"Mpe mu monaka nkonga ya nene ya bantu dezia kuna na Zulu," Jean monaka yawu, "ya makanda nionso, ya badinga nionso, mpe bayinsi nionso, mpe ba vwandaka ya kutelema kuna na ntuala ya Nzambi, na mandalala na maboko ya bawu, ba me lwata ba-robe ya mpembe, ke yimbila, 'Alleluia! Amen! Nkembo, ndwenga, lukumu, lulendo, ngolo, kuvwanda na Nzambi ya beto mvula na mvula. Amen!' ba vwandaka boka."

¹¹⁸ Jean lendaka bakula ve na ntangu yina. Kasi yandi balulaka meso mpe yandi monaka na zulu ya Mongo Sinai, (nkembo) nkama na makumi yiya na yiya ya mafunda ya bantu yina kukitulaka bantu ve na bakento. Ba-Juif! Bakento, mabuundu! Bawu kotaka ata organisation mosi ve, ba-Luthérien, ba-Methodiste, ba-Baptiste, na ba-Presbytérien. Kasi ba vwandaka ba-Juif na kubanda, ba-Orthodoxe, mpe ba vwandaka na tempelo ya bawu kuna, ke sambila na Mongo Sinai. Yina ke nkama na makumi yiya na yiya ya mafunda ya bantu. Ya ke na manima; Dibuundu me kwenda na Nkembo. Beno me mona?

¹¹⁹ Na yawu, Tata Smith vwandaka na kifu, ya kieleka. Na yina, yinki mutindu beno ke sala samu na kutula yawu na 1919, kubasisa nkama na makumi yiya na yiya ya mafunda ya bantu? Na yina beno ke vutuka diaka na malongi ya Russelliste. Beno me mona? Na yina beno ke vutuka na malongi ya Russelliste, ti, "Yesu kwisaka na 1914, na 1919 Yandi me baka Dibuundu ya Yandi, mpe ntangu yayi Yandi ke nzutu ya mansweki ke kwenda na ntoto ya muvimba, samu na kuvumbula. . . ke kwenda na ntoni ya nkooko ya kento mpe na ntoni ya nkooko ya bakala,

mpe kuvumbula bawu nionso, bayina nionso vwandaka ba-Russelliste.” Ya ke na sense ve! Ya ke na sense ve na kati ya Ndinga. Ya me fwanana ve. Ve, tata. Ya me fwanana ve.

¹²⁰ Kasi, Nzambi ke na Kieleka. Mpe Nzambi kele Mosi Yina lenda talisa Yawu mpe kutula Yawu kuna, mpe kutalisa Yawu na beto, na mutindu ya kieleka. Beno me mona? Mu ke kwikila ti Yandi ke sala yawu. Mu me zaba yawu ve. Mu ke na kutuba na beno Kieleka. Mu me zaba ve, kasi mu ke kwikila. Mu ke kwikila ti Yandi ke sala yawu.

¹²¹ Na yawu, beno me mona, Nzambi salaka ata fioti ve na ba-Juif. (Mu zola ti beno simba yayi na mabanza ya beno) mutindu Israel. . .

¹²² Ya ke kisika yina mu vwandaka meka na kutuba na mpangi-bakala yayi me vwanda awa, yina ke tuba ti ya kwenda na Israel, vwanda ntama na Israel! Beno vwanda ntama na yawu, beno nionso yina tubaka samu na kukwenda kubalula bantima ya ba-Juif. Na ntwala ya Nsangu yayi ke mana, beno ke mona ti ya ke **MUTINDU ME TUBA MFUMU**, na nzila ya Ndinga mpe na nzila ya Mpeve. Israel ke balula ntima kuna, yinsi ya muvimba, na nkokila mosi. Biblia me tuba mutindu yina. Kasi Nsangu ya mbote ke ntete samu na bawu ve. Ya ke na mwa ba-renégat yina ke na nganda, mpe nionso yina, yina ke kota, yina ke na nganda ya nzutu ya nene ya ba-Juif, yina ke kota mpe kuzwa mpulusu. Ya kieleka. Mu ke kwikila yawu na ntima ya munu—ya munu ya muvimba.

Kasi, beno bambuka moyo, na ntangu nionso Israel ke vwanda na nganda ya yinsi ya bawu, ba ke kuzwa mpulusu ve. Ntangu yayi ba ke na kuvutuka. Mpe ba ke kuzwa mpulusu, yinsi nionso ya muvimba, na kilumbu mosi. Biblia me tuba mutindu yina. Kilumbu mosi; ke nata, ya muvimba, Israel ya muvimba ke vutuka na Nzambi. Ya ke vwanda na kima mosi ya ngolo mingi ke salama na Israel mosi ya bilumbu yayi, tii kuna ya ke ningisa yinsi ya muvimba. Ata mpe profete kubokaka, mpe yandi tubaka, “Nge me sala yawu na kilumbu mosi.” Kilumbu mosi, ba ke mona Yawu. Ya ke vwanda na kima mosi ya ngolo mingi.

¹²³ Na dibanza ya munu, ya ke vwanda na profete mosi ya ngolo mingi yina ke basika mpe ke telama na ntwala ya Israel, mpe ke siamisa na bawu ti Mesiya yina ke kaka ya moyo. Mesiya yina bawu losaka ke. . . ? . . .

¹²⁴ Ba ke tangaka mwa Biblia yina ya fioti ntangu yayi, Biblia ya Israel. Ba ke tangaka Yawu kubanda na diboko ya kibakala tii na diboko ya kimama, ya ke mutindu ya bawu ya kutanga Yawu. Mpe beno zaba wapi mutindu ba ke sonikaka ndinga ya ba-Juif. Mpe na yawu ntangu ba ke tangaka Yawu. . . Mpe ba ke tangaka yina Lewi Pethrus tindaka bawu, mafuku ya ba-Biblia. Bawu tubaka, “Kana yayi Yesu. . .” Yina ke ba-Juif yina katukaka na Iran, mpe kuna, ba me kuwaka ata fioti ve ba

zonzila bawu samu na Mesiya. Mpe ntangu ba kubamaka samu na kuvutuka na yinsi ya bawu, na yina, ba vwandaka zola ve kumata na avion. Ba vwandaka pindula kaka ntoto na bapusu ya bawu ya ntama. Beno tangaka yawu na magazine *Look*. Bantu yikwa me tangaka bazulunale yina na *Look* mpe *Times* mag-. . .? Na yina, ya kieleka beno me tangaka yawu. Beno me mona? Ba zolaka kumata kuna ve. Kiboba ya rabbin yina telamaka kuna mpe tubaka, “Beno bambuka moyo, profete ya beto tubaka beto ke vutuka na yinsi ya beto na zulu ya mapapu ya ngononi.” Alleluia!

Bayinsi ke na kupanzana, Israel ke na kuvumbuka,
 Bidimbu yina Biblia zabisaka na ntwala;
 Ba ke na kutanga bilumbu ya Bantu ya makanda, ya kifuluka na boma ya nene;
 “Vutuka, O nge yina me zimbana, na yina ya nge.”

¹²⁵ Kulutila mbote beno vwanda ya kuvumbuka. Beno me kuwaka yawu mpe me kuwaka yawu, mpe me kuwaka yawu, kasi ya ke vwanda ntangu ya nsuka, mosi ya bilumbu yayi. Israel ke na kuvutuka na yinsi ya bawu. Wapi kilumbu yina Nzambi me zenga samu na Israel na kuvwanda yinsi, kilumbu yina ya ke vwanda ata fioti ve na Muntu yankaka ya makanda ke kuzwa mpulusu.

¹²⁶ Mu ke talisa yawu na nzila ya basabala makumi sambwadi, kana mu lenda mona kaka bilumbu yayi. Mu ke kwenda na. . . manaka ya astronomie, mpe—mpe Julien, astronomie, mpe ya ba-Romain, mpe nionso yina. Ya ke na ya mingi, kisika mosi kuna. Ya ke na kima mosi. Nzambi kuzaba yawu, mpe, Yandi—Yandi ke na kiyeka ya kutalisa yawu. Beno me mona? Mu zaba ti manaka ya Julien ke vwandaka na bilumbu nkama tatu na makumi sambanu na tanu mpe mosi na zulu ya yiya, na mvula. Na yawu, oh, ya ke na mubulu kuna na kati, kasi ya ke na kieleka, kisika mosi kuna.

¹²⁷ Mu ke mona mabuundu mingi, ba-organisation mingi, bantu mingi ke kwenda na lweka *yayi*, mpe yankaka, “Mbote na nge Maria,” mpe bayankaka ke fukimina *yayi*, *yina*, kima *yankaka*. Ya fwana vwanda na Kieleka, kisika mosi kuna. Ya fwana vwanda na Nzambi, kisika mosi kuna. Ya fwana vwanda na Nsangu mosi, kisika mosi kuna. Mu ke mona baprofete ya luvunu ke basika, ke na kumekula kuswasikisa mabanza ya bantu, mpe mambu nionso ya mutindu na mutindu ke na kusalama. Na yina, ya fwana vwanda na kima ya kieleka kuna, kisika mosi kuna, yina ke vwanda mbandu ya kulanda samu na kumekula yina.

¹²⁸ Mu ke mona bantu ke kota na nzutu, mpe ke boka, mpe ke sala mambu ya mutindu na mutindu, mpe ba ke basika mpe ke zinga konso baluzingu yina. Ya ke vwanda na Mpeve-

Santu ya kieleka kuna, kisika mosi kuna. Mu ke mona bantu ke sala mutindu basambidi, mpe nionso yina, mpe ke meka na kuvwanda na busantu. Mu zaba ti ya ke na Nzambi ya kieleka, kisika mosi kuna. Ya ke na Mpeve ya kieleka, kisika mosi kuna, samu yina ke mwa muntu mosi ya luvunu, mwa kumekula yina kuna. Ya fwana vwanda na kima mosi ya kieleka: muntu, nkonga ya bantu, Dibuundu, Nzambi. Ya fwana vwanda na kima mosi ya kieleka, kisika mosi kuna, samu yina kuna ke kaka ya kumekula. Ya ke na kima mosi ya kieleka, kisika mosi kuna.

¹²⁹ Mu tubaka na dibuundu yayi, samu na yina me tala makabu. Beno sala keba na makabu ya beno; beno keba yawu ya kufwanana na Biblia. Beno baka ve kima yina ba me yingisa, ntangu mazulu me fuluka na bima ya kieleka. Beto kangama na bima ya kieleka. Beto baka yina ya kieleka to beno baka kima mosi ve. Amen.

¹³⁰ Ntangu yayi, na nsuka, diambu kele ti Nzambi ke salaka kaka na Israel ntangu ya ke na yinsi ya yandi. Beto baka mumbandu Nzambi. . . Abraham bikaka yinsi ya yandi mpe yandi kwendaka na Egypte, yinki salamaka? Yandi basikaka na nganda ya luzolo ya Nzambi, mpe ba sakumunaka yandi ata fioti ve tii kuna yandi vutukaka na yinsi ya yandi. Nzambi salaka na yandi ata fioti ve, ata vision mosi ve, kima yankaka ve, tii kuna yandi vutukaka na yinsi ya yandi.

¹³¹ Beno tala Israel ntangu bawu kwendaka kuna na Egypte, bamvula nkama yiya. Ata kimangu mosi ve, ata kidimbu mosi ve, kima mosi ve kusalamaka na kati ya bawu, ba me sonikaka kima mosi ve na Buku ya masolo. Kaka diambu ya mutindu mosi; kukwenda na yinzo-Nzambi, kukaba mwana-dimeme, kutuba “Mbote na nge Maria,” to nionso yina ya ke vwanda, kuvutuka. Mvula ke kwisa, mutindu mosi. Banganga-Nzambi nionso vwandaka kuswana kuna, “Rabbin *Kingandi!* Beto ke soola Rabbin *Kingandi*. Yandi me longokaka mingi. Yandi zaba mingi samu na ba-Egyptien.” Kima ya ntete beno zaba, ba-Egyptien mpe—mpe bayankaka nionso, vwandaka na kima mosi.

¹³² Kima ya mutindu mosi me salama na dibuundu. Beto nionso me kuma ba-Methodiste, to ba-Baptiste, to ba-Presbytérien. “Mpe beto ke na diplôme ya Hartford! Beto ke na diplôme ya Wheaton! Beto ke na diplôme ya kisika ya yankaka, to Bob Jones! Beto, beto ke na Licence na Lettres! Beto ke na Diplôme ya Théologie, Diplôme ya Droit, to kima yankaka!” Yinki ya ke pesa na nsuka? Nkonga ya mambu ya kukondwa mfunu.

Ya ke mutindu yina ya vwandaka na Egypte. Mpe Nzambi salaka ata fioti ve na Israel tii kuna yandi kwisaka na yinsi ya yandi.

¹³³ Beno kuwa munu! MUTINDU ME TUBA MFUMU, Nzambi ke sala na Dibuundu ya Yandi ve tii kuna Yandi ke vutuka na yinsi ya Yandi, Nsangu ya ntangu yayi. Beno vutuka na

kisina! Beno losa mabanza ya beno ya ba-Methodiste, ba-Baptiste, ba-Presbytérien; ya ba-Pentecotiste, ya ba-Assemblée, ya ba-Unitaire, ya ba-Trinitaire, mpe ya Butanu, nionso yina ya kele; dibuundu ya Nzambi, ba-Nazaréen, ba-Pèlerin de la Sainteté, dibuundu ya Klisto, ba-mouvement nionso ya bambeni ya Klisto! Mpe mu ke banza ti yayi ke kwenda bisika nionso na yinza. Nionso na kifu; nionso ya diabulu. Oh, la la! Ya ke na bantu ya busantu na kati ya bawu nionso. Ya ke na bantu ya busantu na kati ya ba-mouvement yina nionso. Kasi organisation, na kati ya yawu mosi, ya ke ya Nzambi ve, mpe Nzambi ke sakumuna yawu ata fioti ve. Ya me salaka yawu ata fioti ve.

¹³⁴ Mu ke yufula konso muntu ya masolo (beno yina ke kuwa yayi na bande) na kusonikila munu samu na kutuba na munu yinki ntangu, dibuundu me salaka organisation, mpe Nzambi me yambulaka yawu ve mpe me salaka na yawu ata fioti diaka ve. Beno tuba na munu ntangu yina Yandi telemisaka diaka ba-Luthérien, Wesley na ba-Methodiste, to ba-Pentecotiste. Ata fioti ve! Organisation yina vwandaka kuna, mpe kubebaka mpe kupolaka! Nzambi bakaka bantu mpe mekaka na kuvutula bawu na yinsi ya bawu. Na yina, bantu yayi ya kulemba mingi mpe babakala-kento, na ba-diplôme ya bawu, tii kuna ba salaka organisation yankaka, yina pesaka mwana ya difelo mbala zole kulutula yina ya mbandukulu.

¹³⁵ Kasi, kisika mosi kuna, ya kieleka, Yehowa ke na muntu yina Yandi lenda tula diboko ya Yandi na zulu ya yandi, yina ke kakula na yawu ve. . .-busantu, organisation ya kukondwa busantu; yina ke vutula bantu na Ditadi, Klisto Yesu, yina ke vutula bawu na pentecote ya kieleka mpe na Mpeve-Santu ya kieleka, na bidimbu ya kieleka mpe bimangu ya kieleka. Ya kieleka Yandi ke na mosi kisika mosi kuna, yina ke lemba nzutu ve na ntwala ya konso bampasi yina, yina ke tina ve, yina ke yambula ve, yina ke lembana ve, kima yankaka ve; yina ke kangama na yawu.

Nzambi ke sakumuna Israel ata fioti ve kana yandi ke na yinsi ya yandi ve.

¹³⁶ Nzambi ke sakumuna beno ata fioti ve mutindu, Methodiste, Baptiste, Presbytérien, Catholique, to Pèlerin de la Sainteté, Nazaréen, dibuundu ya Klisto, to—to organisation ya ba-Pentecotiste. Yandi ke sakumuna beno ata fioti ve mutindu yina. Beno vutuka na yinsi ya beno, na mbandukulu, na nzingilu ya pentecote mutindu ya vwandaka na Kilumbu ya Pentecote ntangu Ngolo ya Nzambi ya moyo sobaka mafunda ya bantu, mpe pelisaka bantima ya bawu na Tiya ya Nzambi, yina vwandaka talisa bidimbu ya kieleka; bidimbu ya kumekula ve, mwa télépathie yina ba me yidika, mwa kima mosi ya luvunu ve, mpe tii kuna ya ke kuma kisika yina muntu mosi ke zola kuyiba yina yankaka mutindu beto ke na yawu na Amerique.

“Nani ke na tenta ya kulutila nene?” To, “Nani ke na nkonga ya bantu ya kulutila nene?” Yinki luswaswanu ya ke sala na Nzambi? Nzambi ke zola bantu ya bantima ya kuvedila, nkonga ya bantu ya nene ve. Mpe beto nionso me kuma na kisika yina muntu mosi zola kuyiba muntu yankaka, awa. Ya ke nsoni, na kumeka kuyika mafunda ya bantu na organisation ya beto. Ya ke nsoni. Yandi zola ti beto vutuka na Kieleka, beto vutuka na Mpeve, beto vutuka na Nsemo ya kieleka, beto vutuka na bala-bala kati na Klisto, beto vutuka na Kieleka. Wapi mutindu Yandi lendaka sakumuna beto na nzila yina beto ke landa? Yandi ke sala yawu ve.

¹³⁷ Yandi sakumunaka Israel ata fioti ve tii kuna bawu vutukaka na yinsi ya nsilulu. Mpe ntangu ba vutukaka na yinsi ya nsilulu, bidimbu mpe mambu ya ngitukulu bandaka na kusalama. Yandi tindaka muntu kuna na kati ya bawu, na nkumbu ya Moise. Yinki Moise yayi kwisaka na yawu kuna, théologie ya kuyidika mbote-mbote? Yandi kwisaka kuna na diplôme ya Licencié na Lettres? Yandi kwisaka kuna na Doctorat ya Droit, Doctorat na Philosophie? Yandi kwisaka kuna na ngolo ya Yehowa, mpe na nsangu mosi, “Beno vutuka, na yinsi yayi, beno kwenda na yinsi ya beno. Vutuka, O nge yina zimbanaka, na yina ya nge.” Amen!

¹³⁸ Tala ntama ve bamvula mafunda zole, ba-Juif ke na nganda ya yinsi ya bawu, ba me panzana na bitembo yiya ya ntoto. Beto lendaka sala basabala na Nsangu yayi, kana beto fwana kota na mudindu. Beto lenda vutula Israel kuna na manima mpe kutalisa ti ba panzaka bawu na Kimfumu ya Roma, samu ba losaka Mesiya; ba panzanaka na bayinsi nionso ke na nsi ya Mazulu.

Beto vutuka kuna na Jacob, Israel, beto vutuka na Genèse 44 na 45, mpe kutalisa kuna wapi mutindu yandi sakumunaka bakuluntu yina mpe tubaka na bawu kieleka kisika ba ke vwanda na bilumbu ya nsuka. Mpe mu lenda talisa na beno kieleka (konso yinsi) ya Israel, konso dikanda ya Israel, yina ba me tula kieleka na kati ya bayinsi kisika wapi ya tubamaka ti ya ke vwanda. Mpe beto me kuma kisika yango bubu yayi.

¹³⁹ Juif yina beto me zaba, kele Juif ya kieleka ve. Juif ya kieleka kele Orthodoxe yina ya kieleka me tula kukitula mvindu ve na bima ya yinza, yina me basika ve samu na kukota na mabuundu yankaka. Ya ke bayina ke vutuka kuna, ke zingaka na fromage na dimpa, na balweka ya mongo, ba ke na muswa ve ya kukota na mbanza ya ntama. Ba me tungaka mbanza na lweka yayi, na no-man’s-land, na ba-mitraillete ya kuludika na balweka nionso zole. Kasi yandi me banda na kubasisa mwa bafelele. Amen, mpe amen! Ntangu me kuma pene-pene.

¹⁴⁰ Ya ke na Ismael na Isaac, me telama kuna, ke na kuswana samu na yinsi, kuna, kasi ya ke ya Israel. Kana beno kuzwa ntangu ya kukwenda na Jérusalem ya malu-malu, ba ke bika

beno luta ve na Jérusalem ya ntama. Beno fwana kwenda ntete kuna samu ba tendula na beno nionso yayi, ba-Arabe, na manima ba ke nata beno na simu yina yankaka. Yayi ke bana ya Ismael. Kasi, tala, ntangu mosi ke kwisa wapi bana ya Nzambi ke kubotula yawu. Ya kieleka. Jérusalem ke tungama diaka. Munkayulu ya konso kilumbu ke kuvutuka.

Mpe mbeni ya Klisto ke sala ngwisani na basabala sambwadi ya nsuka. Mpe na kati-kati ya yawu, yandi ke zenga ngwisani yina, yandi ke balula nionso na malongi ya Catholique. Ya ke mutindu yina busafu ke mwangana bisika nionso, mutindu yina, na manima nsuka ke kwisa.

¹⁴¹ Beto tala, “basabala makumi sambwadi.” Yinga, ntama ve bamvula mafunda zole ba ke ntama kuna; ba me bengana bawu ntangu yayi, bantu ya bawu; mutindu ya vwandaka na ntangu ya Pharaon ntangu ba kumisaka ntima ya yandi ngolo, Yandi fwanaka kukumisa ntima ya Hitler ngolo. Ba-million ya bawu kufwaka. Beno tala Eichmann yayi, ya ke ya kubwa samu yandi kufwaka ba-million sambanu ya ba-Juif. Ba-million sambanu na kati ya bawu, mioyo ya bantu, ba-bébé, bana, bambuta, yandi kufwaka bawu nionso; Eichmann, muntu mosi. Beno tala Russie, wapi mutindu ba me bengana bawu kuna. Ba me bengana bawu bisika nionso. Ba vwandaka yinsi yina ba me vweza.

¹⁴² Kasi samu na zola ya mbongo ya bawu, ba kwisaka vutuka diaka. Kasi mwa nkonga yina ya fioti ke na kuvutuka na Palestine. Amen, bampangi! Ntangu beno ke mona yandi kubanda na kuvutuka na yinsi ya yandi!

¹⁴³ Ba ke mingi kuna samu na kusala nkama ya makumi yiya na yiya ya mafunda. Mpe yinki ke salama? Ba ke zaba Joseph ya bawu. Beno vwanda na boma ve. Yinga, tata. Mpe bawu nionso ke vingila kuna samu na kumona yawu kusalama. Mpe na ngunga yina . . .

¹⁴⁴ Bayinsi me ndima bawu mutindu yinsi, na mvula me luta. Ntangu yina ke salama, beto ke kuma pene-pene na nsuka, Dibuundu ya Bantu ya makanda me kwenda. Na yawu, na konso ntangu yina, Nzambi lendaka tuba, “Israel kele bantu ya Munu.” Ntangu yina ke salama, ntangu ya Bantu ya makanda me mana.

¹⁴⁵ “Ba ke niata yawu na makulu,” Yesu tubaka, na Matthieu 24. “Busafu yina ke pesaka kiadi, ba ke diata na makulu bibaka ya Jérusalem tii kuna nsungi ya Bantu ya makanda ke mana.” Ntangu yina ke mana, na yina ba-Juif ke vutuka na Jérusalem, samu na vutula tempelo na kisika ya yawu mpe tempelo ya bisambu. Beto ke mona yawu nionso na Bansangu yayi ke kwisa na ntuala, basabala makumi sambwadi ya balukanu sambanu.

Ntangu yayi mu ke tanga yawu na ntwala beto sukisa, samu ya ke vwanda kaka ntangu samu na beto na kuvutuka na bayinzo ya beto, na yina beto ke kwisa vutuka na ngunga ya sambwadi na nkokila.

¹⁴⁶ Ntete, ntete, kana beno ke sonika yawu, “Samu na kumanisa yimbi.” Daniel, kapu 9, nzila ya 24. “Samu na kumanisa yimbi,” mosi. “Samu na kusukisa disumu,” zole. “Samu na kuyidika disumu ya nkú,” tatu. “Samu na kunata kieleka ya seko,” yiya. “Samu na kutula kidimbu na vision mpe profesu,” tanu. “Samu na kupakula kisika ya kulutila Santu,” sambanu. Mpe yawu yina beto ke tubila na nkokila yayi. Nzambi, ke na kulungisa yawu!

¹⁴⁷ Beno vingila ntangu yayi, beno bika mu vutukila yawu diaka, samu beno bakula yawu. Ya ntete, “samu na kumanisa yimbi.” Ya zole, “samu na kusukisa disumu.” Tatu, “samu na kuyidika disumu ya nkú.” Ya yiya, “samu na kunata kieleka ya seko.” Ya tanu, “samu na kutula kidimbu na vision mpe profesu.” Ya sambanu, “samu na kupakula kisika ya kulutila Santu.”

Beno bika mu tanga yawu samu na beno ntangu yayi, na kati ya Biblia. Ya ke nzila ya 24.

Sambwadi-. . . *basabala ba me zenga samu na bantu ya nge (ba-Juif) mpe samu na mbanza ya nge ya santu—samu na mbanza ya nge ya santu (Israel, ba-Juif, Jérusalem), samu na kumanisa. . . bayimbi (mosi), . . . samu na kusukisa disumu (zole), . . . samu na kuyidika disumu ya nkú (tatu), . . . samu na kunata kieleka ya seko (yiya), mpe samu na kutula kidimbu na vision (tanu)—vision mpe profesu, mpe samu na kupakula kisika ya kulutila Santu (sambanu).*

¹⁴⁸ Tala ya kieleka yina Yandi kwisaka kuzabisa yandi, yina ke salama, na manima nsuka ke vwanda.

¹⁴⁹ Ntangu yayi, na nkokila yayi beto ke tubila bima yina, mpe beto ke mona wapi mutindu beto me kuma pene-pene na yawu. Na yina Lumingu ke kwisa, beno ke mona bima yayi na kati ya ntangu mpe kutalisa kieleka kisika beto kele. Mu zola Yandi.

¹⁵⁰ Israel ke na kuvutuka na yinsi ya bawu, Israel. Beno bika mu tuba yayi ntangu yayi na mwa ntangu fioti. . . Mu banza ba me kanga bande. Beno bika mu tuba yayi. Na ntangu yina Israel me kuma yinsi. . . Ya kele samu na yawu mu ke kwikilaka ntangu nionso, mu ke tubaka yawu na ntwala ya bantu ya munu awa, ti mu vwandaka na kima mosi ya kusala, na ntwala mu kufwa, ya ke kuvutula Israel na Mfumu. Samu, kaka na ntangu yina, na nzila ya charte Panaméricaine, yina ba ndimaka ti Israel me kuma yinsi mosi, samu na mbala ya ntete na bamvula mafunda zole kubanda ba me panzanaka, ba vwandaka diaka ve nkonga ya bantu; ya vwandaka kaka na ngunga yina, na ngunga ya kieleka, yina Wanzio ya Mfumu kukutanaka na munu kuna mpe fidisaka munu na. . . na Nsangu ya mbote. Na ntangu yina mosi, na kilumbu ya 7 ya Ngonda ya tanu, na mvula 1946.

¹⁵¹ Ntangu yayi, na yina, kima yankaka yina ke sala ti mu kuzaba. Ya ke “kuvutula bantima ya bana na batata, mpe

bantima ya batata na bana,” Nsangu. Beno simba mbote, Malachie 4 (3 ve), 4!

¹⁵² Kima yankaka. Ntangu Billy, mwana ya munu ya bakala, na munu, Mpangi Ern Baxter, vwandaka kwenda na Palestine, na manima beto kutanaka na ba-Juif na sika ya Mpangi Arganbright, mpe ba monaka lukutakanu. Lewi Pethrus yina kutindaka ba-Biblia yayi kuna. Mpe yandi tubaka... Ba-Juif yayi kwisaka, ba tubaka, “Kana beno bokila nkonga ya bantwadisi ya Israel, Mu zola tuba, ba-rabbin yayi ya malu-malu ve na mikembo ya bawu, kasi beno bokila bantwadisi ya kieleka ya Israel kintwadi. Mpe beto me tanga Ngwisani ya Malu-malu, mpe beto me zaba ti ntangu Mesiya ke kwisa, Yandi ke tuba na beto mambu yayi, mutindu kento ya Samarie. Beto zaba ti Moise tubaka Mesiya ya beto ke vwanda profete. Mpe ntangu beno lenda tuba na bawu mpe kutalisa na bawu, na nzila ya Masonuku,” yawu yina beto ke longoka na Nsangu ya nkokila yayi, “ti ba ke vwanda meso ya kufwa mpe ba lendaka katula bantima ya bawu, na mutindu ti ntangu ya Bantu ya makanda kukwisa, yawu yina beto ke ntangu ya kuvutula ngwisani samu na Bantu ya makanda. Mpe bantima ya bawu vwandaka ngolo kieleka mutindu ya vwandaka na ntangu ya Joseph, mpe nionso yina. Na manima beno nata ba-Juif yina na kisika mosi, mpe beno bokila bantu yina kuna na lukutakanu, kaka mutindu beno ke sala yawu awa na Bantu ya makanda, na nzila ya lutwadusu ya Mpeve. Samu,” ba tubaka, “Kana yayi ke Yesu, kana Yandi ke Mesiya, mpe bandinga ya nge ke ya kieleka, na yina Yandi me kufwa ve, mpe Yandi ke ya moyo. Mpe kana Yandi ke ya moyo, Yandi silaka na kuvwanda na kati ya Yandi... kisa... Kisadi ya Yandi—kisadi, bilandi ya Yandi. Mpe kana beto lenda mona Yandi kusala kidimbu ya profete, na yina beto ke kwikila ti Yandi kele Mesiya.”

Yinki diambu yayi ya kulunga, ya kieleka kaka. Na manima, yinki ya ke sala? Yinsi mosi lendaka butuka na kilumbu mosi, na kati ya bantwadisi. Mosi na mosi ya bawu lendaka tuba, “Beto zaba yawu.” Ntangu rabbin yina ke tuba yawu, ya ke sukisa diambu. Yinsi mosi ke butuka na kilumbu mosi. Israel ke butuka na kilumbu mosi.

¹⁵³ Mpe mu vwandaka na nzila, mpe mu telemaka na Caire, na Egypte, na ticket ya munu na diboko, mpe minuti kumi na tanu to makumi zole ba bokila na allo-allo. Ba zolaka bokila na allo-allo. Mpe mu kwendaka kuna samu na kutala mwa kima mosi na yinti ya ébène yayi, na mwa nzoko mosi me salama na yinti ya ébène, na binwaninu ya ivoire. Mu zolaka kutinda yawu na nkundi ya munu ya dokotolo, Docteur Sam Adair, samu na presse papier. Mpe mu vwandaka tala yawu. Mpe Kima mosi tubaka na munu, “Ntangu me lunga ntete ve. Vwanda na nganda ya Palestine.”

154 Na yawu mu banzaka, “Yina ke munu ke banza kaka mutindu yina.” Mpe mu landilaka na kukwenda.

Kima mosi tubaka, “Ntangu me lunga ntete ve.”

155 Mpe mu kwendaka na manima ya hangar. Mu telemisaka yintu ya munu na Nzambi. Mu tubaka, “Nzambi, ya kele Nge yina vwandaka tuba na munu?”

156 Ya tubaka, “Ntangu me lunga ntete ve. Vwanda na nganda ya Palestine. Ntangu me lunga ntete ve.” Na manima mu bakaka ticket ya munu mpe mu sobaka yawu, mpe katuka kuna mu kwendaka na Rome, mpe mu vutukaka na Lisbon, na Portugal, mpe katuka kuna mu vutukaka na Etats-Unis.

157 Ntangu vwandaka me lunga ntete ve. Disumu ya nkú ya Bantu ya makanda me fuluka ntete ve, kaka na nsongi ya mbungu. Kasi kilumbu mosi ya ke fuluka, mpe Nzambi ke fidisa muntu mosi kuna yina ke vwanda profete, mpe yandi ke talisa yawu na bawu. Mu ke tula kivuvu ti Nzambi ke telemisa yandi na nswalu nionso, nionso yina ya ke vwanda, ya ke telemisa yandi na nswalu nionso. Mu ke kwikila ti ya ke kwisa. Yawu yina beto ke na kulongoka yayi, ti beto me kuma pene-pene.

158 Mpe, beno bambuka moyo, na ntangu yina ba-Juif ke yamba Klisto, Dibuundu ya Bantu ya makanda me kwenda. Na manima ba ke mwangisa bampasi na zulu ya Bantu ya makanda, Bampasi.

159 Mpe—mpe wapi mutindu babakala, milongi ya nene ke na kulonga, mpe ba ke na Biblia na ntwala ya bawu mutindu yayi, mpe ba ke tuba ti Dibuundu ke luta na ntangu ya Bampasi, na ntangu ya ke na Masonuku ve na kati ya Biblia yina ke tuba yawu! Ba ke na kima ya kusimbisa bawu ve.

160 Muntu mosi tubaka na munu, ntama mingi ve, yandi tubaka, “Oh, Mpangi-kento McPherson longaka ti Dibuundu ke luta na Bampasi, samu beto ke semisa bansemo na ntangu yina.” Yina ke Israel, Bantu ya makanda ve.

Bantu ya makanda me kwenda, Dibuundu. Ba fwana luta na Bampasi ve. “Dalango mwangisaka masa na yinwa ya yandi,” kapu 17, “mpe salaka mvita na yina bikalaka,” mwense yina kulalaka. Ya kele ve. . . Dibuundu ya kieleka me kwenda. Ya me kuma dezia na Mukembo ya Makwela samu na yayi, samu na ntangu yina ya ke vwanda na Mukembo ya Makwela, sabala ya nsuka. Mpe ya ke na ntangu yina Bampasi ke banda, ntangu mampasu na bampasi ke telema samu na mabuundu, mambu ya mutindu yina.

Na yina, na nsuka, na kapu 19, Yandi yayi me kwisa na Bakala ya Yandi ya makwela. Alleluia! “Ntinu ya ntinu, mpe Mfumu ya bamfumu; kinkuti ya Yandi ya kupola na Menga, mpe makesa ya Mazulu na zulu ya bampunda ya mpembe, ke kwisa

na Yandi. Yandi yina ke kwisa, samu na kubaka kisika ya Yandi samu na Millenium. Amen! Oh!

Nkumbu kusakumuka, oh, Nkumbu
kusakumuka,
Nkumbu ya Mfumu kusakumuka;
Nkumbu kusakumuka, oh, Nkumbu
kusakumuka,
Nkumbu ya Mfumu kusakumuka.

Yesu kele Nkumbu, Yesu kele Nkumbu,
Yesu kele Nkumbu ya Mfumu;
Yesu kele Nkumbu, oh, Yesu kele Nkumbu,
Yesu kele Nkumbu ya Mfumu.

Beno kumisa Nkumbu ya Yandi, oh, beno
kumisa Nkumbu ya Yandi,
Oh, beno kumisa Nkumbu ya Mfumu;
Beno kumisa Nkumbu, oh, beno kumisa
Nkumbu,
Beno kumisa Nkumbu ya Mfumu.

¹⁶¹ Wapi mutindu beno ke salaka yawu? Beno ke kumisaka Yawu nene na luzingu ya beno. Beno ke zinga luzingu yina ba lendaka kutuba, “Yina ke kisadi ya Klisto.” Ya ke mutindu yina beno kumisaka Nkumbu. Beto tala. Oh, beno zola Yandi ve? Oh, la la! Mwa nkunga ya beto ya fioti ntangu yayi:

Ntama kuna na kidikilu, mu zaba ti ya ke ya
kieleka,
Bébé mosi me butuka samu na kuvulusa bantu
na masumu.
Jean monaka Yandi na kumu ya mubu, Mwana-
dimeme samu na bamvula nionso,

Mwana-dimeme yina na Bidimbu Sambwadi, Mosi kaka na Zulu mpe na ntoto wwandaka na kiyeka ya kubaka yawu.

Na kidikilu—na kidikilu ntama kuna, mu zaba
ti ya ke kieleka mutindu yina,
Bébé mosi me butuka samu na kuvulusa bantu
na masumu.
Jean monaka Yandi na kumu ya mubu, Mwana-
dimeme samu na bamvula nionso,
Oh, Nkumbu ya Mfumu kusakumuka.

Oh, Nkumbu kusakumuka, oh, Nkumbu
kusakumuka,
Nkumbu ya Mfumu kusakumuka;
Nkumbu kusakumuka, Nkumbu kusakumuka,
Nkumbu ya Mfumu kusakumuka.

¹⁶² Mu ke zolaka kusambila. Beno ve? Ntangu yayi, beto ke kwisaka na yinzo-Nzambi ve samu na kuwa kaka dilongi mosi; yina ke tambula na yawu. Kasi beto ke kwisaka na yinzo-Nzambi

samu na kusambila, kusambila na Mpeve mpe na Kieleka. Beno me kuwa Kieleka, ya ke Ndinga. Beno me mona? Ntangu yayi, kusambila, ya ke kutuba na Yandi bansatu ya beno. Beno me mona?

Oh, Mu Zola Bakala Yayi Ya Galilée, pesa beto mwa note samu na yawu. Yinga, tata. Nge zaba yawu, Teddy? Mu me zimbana ntangu yayi. Beto tala. Beto tala.

Oh, mu zola Bakala yayi ya Galilée, ya Galilée,
Samu Yandi me sala mingi samu na munu.
Yandi me lemvokila masumu ya munu, me
fulusa munu na Mpeve-Santu;
Oh, mu zola, mu zola Bakala yayi ya Galilée.

Mufutisi mpaku kwendaka kusambila na
tempelo kilumbu yina,
Yandi bokaka, “O Mfumu, wila munu mawa!”
Yandi lemvokilaka yandi masumu nionso, mpe
ngemba ya lembami fulukaka na kati ya
yandi;
Yandi tubaka, “Beni kwisa tala Bakala yayi ya
Galilée.”

Oh, mu zola Bakala yayi ya Galilée, ya Galilée,
Samu Yandi me sala mingi samu na munu.
Yandi me lemvokila masumu ya munu nionso,
me fulusa munu na Mpeve-Santu.
Oh, mu zola, mu zola Bakala yayi ya Galilée.

Kikata kutambulaka, baba tubaka.
Ngolo zabisamaka na zola na zulu ya nzadi.
Mpofu kumonaka, mu zaba ti ya ke kaka
Ngolo ya Bakala yina ya Galilée.

Oh, mu zola Bakala yina ya Galilée, ya Galilée,
Samu Yandi me sala mingi samu na munu.
Yandi me lemvokila munu masumu nionso, me
fulusa munu na Mpeve-Santu.
Oh, mu zola, mu zola Bakala yina ya Galilée.

Beno kuwa yayi:

Kento yina na dibulu ya masa, Yandi tubaka na
yandi masumu ya yandi nionso,
Ti yandi vwandaka na babakala tanu na
ntangu yina. (Ya kele Yandi.)
Ya lemvokilaka yandi masumu nionso, mpe
ngemba ya lembami fulukaka na kati ya
yandi;
Na yina yandi bokaka, “Beni kwisa, kutala
Bakala yina ya Galilée!”

Oh, mu zola Bakala yina ya Galilée, ya Galilée,
 Samu Yandi me sala mingi samu na munu.
 Yandi me lemvočila munu masumu nionso, me
 fulusa munu na Mpeve-Santu.
 Oh, mu zola, mu zola Bakala yina ya Galilée.

Mu zola Yandi. Beno ve? Na ntima ya munu ya muvimba!
 Beno ve? Yandi ke kitoko ve?

Oh, mbote, mbote, Yesu kele samu na munu,
 (Yinki Yandi kele?)
 Konseye, Ntinu ya Ngemba, Nzambi ya Ngolo
 Yandi kele;
 Oh, ya me vulusa munu, ke keba munu na
 masumu mpe nsoni nionso,
 Musumbi ya munu kele mbote, mu ke kumisa
 Nkumbu ya Yandi!

Beto kulumusa bayintu ya beto ntangu yayi mpe beto
 banza yawu.

Mu vwandaka ya kuzimbana, kasi ntangu yayi
 ba me kuzwa munu, mu ke na kimpwanza
 ya lufundusu, (Bayinsi ke na kupanzana;
 diambu ve.)
 Yesu ke pesa kimpwanza mpe mpulusu ya
 kieleka;
 Ya me vulusa munu, Yandi ke keba munu na
 masumu mpe nsoni nionso,
 Musumbi ya munu kele mbote, mu ke kumisa
 Nkumbu ya Yandi!
 Oh, Yesu kele mbote, mbote, samu na munu,
 Konseye, Ntinu ya Ngemba, Nzambi ya Ngolo
 kele Yandi;
 Ya me vulusa munu, ke keba munu na masumu
 mpe nsoni nionso,
 Musumbi ya munu kele mbote, mu ke kumisa
 Nkumbu ya Yandi!

Oh, beno banza yawu!

Mu vwandaka ya kuzimbana, ntangu yayi ba
 me kuzwa munu, mu ke na kimpwanza ya
 lufundusu,
 Yesu ke pesa kimpwanza mpe mpulusu ya
 kieleka;
 Yandi me vulusa munu, (Yinki Yandi ke sala?)
 ke keba munu na masumu mpe nsoni nionso,
 (Na zulu ya nionso yayi.)
 Oh, Musumbi ya munu kele mbote, mu ke
 kumisa Nkumbu ya Yandi!

Beto nionso kintwadi ntangu yayi!

Oh, Yesu keke mbote, mbote, samu na munu,
Konseye, Ntinu ya Ngemba, Nzambi ya Ngolo
keke Yandi;

Na yina, yandi me vulusa munu, ke keba munu
na masumu mpe nsoni nionso,
Musumbi ya munu keke mbote, mu ke kumisa
Nkumbu ya Yandi!

Oh, mu me zola Yesu, (Nkembo!)

Oh, mu zola . . .

Kiese mingi mu me vuluka! Kiese mingi mu ke na kuvingila
Nkwizulu ya Yandi!

Oh, mu zola Yesu,
Samu Yandi zolaka munu ya ntete.

Ntangu yayi na maboko ya beto na zulu, kana beto ke ya
kuvedila.

Mu ke yambula Yandi ve,
Mu ke yambula Yandi ve,
Mu ke yambula Yandi ve,
Samu Yandi zolaka munu ya ntete.

¹⁶³ Beno zola Yandi? [Dibuundu me tuba, “Yinga.”—Mu.] Na
yina beno fwana zolana mosi na yankaka. Samu, kana beno ke
zolaka ve bayina beno lendaka kumona awa, wapi mutindu beno
lenda zola Yandi Yina beno me monaka ve? Beto pesana mbote
mosi na yankaka, beto tuba:

Oh, mu zola Yesu,
Oh, mu zola Yesu,
Oh, mu zola Yesu,
Samu Yandi zolaka munu ya ntete.

Ata fioti ve mu ke . . .

Beno telemisa maboko ya beno na Yandi ntangu yayi.
Yawu yina.

. . . yambula Yandi,
Mu ke yambula Yandi ve,
Mu ke yambula Yandi ve,
Samu Yandi zolaka munu ya ntete.

¹⁶⁴ Beno banza yawu, Yandi me talisa na beto luzayikisu yina
ya nene. Beto zola Yandi ve? Yandi keke mbote ve? Beto ke vutula
matondo mingi na Mfumu ya beto Yesu; Yandi ke yambula beto
ata fioti ve. “Tala, Mu ke na beno bilumbu nionso, tii na . . .”
Beno me sepela na *Basabala Sambwadi Ya Daniel?* [Dibuundu
me tuba, “Amen.”—Mu.] Oh, beto zola Yandi ve? Yinki ya ke sala?

Lukwikilu ya munu ke tala na Nge,
Nge Mwana-dimeme ya Calvaire,
Mvulusi . . .

Beno sambila Yandi kaka, na kati ya bantima ya beno.

Wa munu na ntangu mu ke sambila,
 Nata ntama masumu ya munu nionso,
 O bika mu vwanda kubanda bubu yayi
 Ya muvimba ya Nge!

Na kisika yina ya kukangama, (Beto nionso me
 kuma kuna.)

Mpe bampasi me ziunga munu, (Yinga,
 Mfumu.)

Nge vwanda Ntwadisi ya munu; (Twadisa
 munu na kati ya yawu, Mfumu!)

Oh, bika ti mpimpa kusoba na nsemo,
 Katula masa ya meso ya munu,
 Kubika ve ti mu kwenda
 Ntama na Nge.

[Mpangi Branham ke niunguta *Lukwikilu Ya Munu Ke Tala Na Nge—Mu.*]

Pesa na tima ya munu,
 Zebi ya malu-malu;
 Bika ti mpimpa kusoba na nsemo,
 Katula masa ya meso ya munu,
 O bika mu vwanda kubanda bubu yayi
 Ya muvimba ya Nge!


¹⁶⁵ O Yesu, beto me mona ti beto me kuma pene-pene ya kima mosi. Profete Esaie tubilaka yawu; Jérémie tubilaka yawu. Daniel talaka mpe monaka yina ba tubaka. Ya salaka ti ntima ya yandi kuningana, mpe yandi—yandi balulaka kizizi ya yandi na Zulu. Yandi mangaka madia, yandi bakaka saki na mbombi. Yandi zolaka kuwa, samu yandi kukebisa bantu.

¹⁶⁶ Mfumu, beto me mona na nzila ya ba-Buku, mpe, Buku ya Nge, Buku ya Esaie, Buku ya Jérémie, Buku ya Jacques, Jean, Luc, Marc, Matthieu, Buku ya Apocalypse, ba-Buku ya Nge nionso, ti beto me kuma pene-pene ya nsuka. Mpe beto me balula kizizi ya beto na Zulu, na kisambu, kubondila, samu na kumona kisika beto ke na kuzinga, Mfumu. Beto me banda na kumona nsemo ya kilumbu me banda na kufiotuka. Mpe, Mfumu, beto me kwisa na Nge. Lukwikilu ya beto ke tala na Nge ntangu yayi. Beto ke katula buzitu nionso, masumu nionso, mwa kukondwa lukwikilu yina ke fuka beto kukondwa mpasi, beto ke na kukima mbangu na mantwala samu na kuzwa musendo yina ba ke na kubokila beto na kuzwa ntangu ntangu ya beto ke kuma na nsuka.

¹⁶⁷ Sakumuna bantu yayi awa, Mfumu. Bawu zola Nge. Ba ke ya Nge. Ba me basika. Nge ke Yina ke pesaka luzayikisu. Beto ke sambila ti Nge ke pesa beto bima yayi mutindu beto ke vingila Nge.

¹⁶⁸ Pesa beto manima ya midi ya mbote samu na kulunguka, Mfumu. Pesa beto lubakusu. Vutula beto diaka ya malu-malu, na

nkokila yayi. Mfumu, pakula munu na manima ya midi yayi, oh, mutindu mu ke longuka, Mfumu, samu na bima yayi sambanu ya kumonana ya Gabriel. Kana Gabriel me kwisa kumonana mpe me pesa bantendulu sambanu, Mfumu, beto fwana zaba yawu. Beto ke longuka ba-Buku mpe beto zaba ti beto me kuma pene-pene. Na yawu beto ke sambila ti Nge ke talisa yawu na beto na nkokila yayi.

¹⁶⁹ Lumingu ke kwisa, Mfumu, O Nzambi, tula bilumbu yayi na kisika ya yawu kuna. Mu zaba ve wapi mutindu kusala yawu, kasi Nge lenda twadisa beto na ntangu yango. Pesa yawu, Tata. Beto ke tala na Nge. Beto ke zolana mosi na yankaka mpe Menga ya Yesu Klisto, Mwana ya Nzambi, me sukula beto na masumu nionso. Beto ke tala na Nge ntangu yayi. Sadisa beto mutindu beto ke vingila Nge, Tata, na nzila ya Yesu Mfumu ya beto. 

BANDONGOSOLO YA GABRIEL NA DANIEL KNG61-0730M
(Gabriel's Instructions To Daniel)

BANDANDANI YA BASABALA MAKUMI SAMBWADI YA DANIEL

Nsangu yayi ya Mpangi William Marrion Branham, kulongamaka na Kingelesi, na Lumingu nasuka, na klumbu ya 30 na Ngonda ya sambwadi, na mvula 1961, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org